

2010-mi aningaasanut inatsisissatut siunnersuut

pillugu

Inatsisartut Aningaasaqarnermut Ataatsimiititaliaata

ILASSUTITUT ISUMALIUTISSIISUTAA

Inatsisissatut siunnersuutip pingajussaaneerreqarnerani saqqummiunneqartoq

Aningaasaqarnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Naaja Nathanielsen (Inuit Ataqtigiit), siulittaasoq

Inatsisartunut ilaasortaq Niels Thomsen (Demokraatit), siulittaasup tullia

Inatsisartunut ilaasortaq Per Berthelsen (Siumut)

Inatsisartunut ilaasortaq Aqqaluaq Egede (Inuit Ataqtigiit)

Inatsisartunut ilaasortaq Finn Karlsen (Atassut)

Imarisai:

1. Aallaqqaasiut.....	4
2. Aningaasaqarnermut Ataatsimiititaliap apeqqtai/oqaaseqaatai aalajangersimasut – suliassaqaarfinnut agguataarlugit.....	5
2.1. Suliassaqaarfik 20-24 Aningaasaqarnermut Naalakkersuisoq.....	5
2.2. Suliassaqaarfik 34 Peqqissutsimut Naalakkersuisoq.....	6
2.3. Suliassaqaarfik 40 Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq.....	7
2.4. Suliassaqaarfik 50-51 Aalisarnermut, Piniarnermut Nunalerinermullu Naalakkersuisoq.....	9
2.5. Suliassaqaarfik 70-73 Ineqarnermut, Attaveqarnermut Angallannermullu Naalakkersuisoq.....	10
2.6. Suliassaqaarfik 77 Nunami Namminermut Pissutsinut Naalakkersuisoq.....	12
2.7. Suliassaqaarfik 80-89 Ineqarnermut, Attaveqarnermut Angallannermullu Naalakkersuisoq.....	13
3. Aningaasaliissutinut allannguutissatut siunnersuutit.....	14
3.1 Sammisqaq 5 – Aningaasartuuteqarnerunissamik kissaatit.....	15
3.2 Sammisqaq 11 – Pingajussaaneerinninnissamut teknikkikkut allannguutit.....	17
3.3 Sammisqaq 12 – Pingajussaaneerinninnissamut sanaartornermi nussuineq.....	20
3.4 Sammisqaq 13 – Akitsuutit atuinermilu akiliutit.....	20
3.5 Sammisqaq 14 – Pingajussaaneerinninnissamut missingersuutinut sunniuteqanngitsumik allannguutit.....	21
3.6 Sammisqaq 15 – KIIIN-imi allaffissornikkut utaqqiisaasumik ineqartitsinermit sipaarutit.....	21
3.7 Sammisqaq 16 – Ingerlatsinermit ileqqaarutit.....	22
3.8 Sammisqaq 17 – Sanaartornermit ileqqaarutit.....	23
3.9 Sammisqaq 18 – Pingajussaaneerinninnissamut isertitaqarnerunissamik inatsisitigullu aningaasartuutinit pisussaaffigisanit naatsorsuutit.....	24
3.10 Sammisqaq 22 – AUL-imut tapiissutit taakkulu aningaasalersornerat.....	26
3.11 Sammisqaq 23 – Aningaasaqarnermut Ataatsimiititaliap allannguutissatut siunnersuutai	27
4. Oqaasertaliussanut allannguutissatut siunnersuutit.....	30
4.1 Naalakkersuisut oqaasertaliussanut allannguutissatut siunnersuutaat.....	30
4.2 Aningaasaqarnermut Ataatsimiititaliap oqaasertaliussanut allannguutissatut siunnersuutaa.....	32
4.3 Allannguutissatut siunnersuutit aningaasatigut kingunissaat.....	33
5. Aningaasaqarnermut Ataatsimiititaliap kaammattuutai	33
6. Aningaasaqarnermut Ataatsimiititaliamit inassuteqaatit	34

Ilanngussanut takussutissiaq:

- A. Pingajussaaneerinissamut aningaasaliissutinut oqaasertaliussanullu Naalakkersuisut allannguutissatut siunnersuutaat nr. 211-283.
- B. Pingajussaaneerinissamut aningaasaliissutinut Naalakkersuisut allannguutissatut siunnersuutaat nr. 284-287.
- C. Ulloq 13. november 2009 KANUKOKA-p Aningaasaqarnermut Ataatsimiititaliamut sassarneranit allakkiat missingersuutillu aammalu Akileraartarnermut Akitsuusiisarnermullu Ataatsimiititaliap ulloq 5. november 2009-mi Kommuneqarfik Sermersuumeersunik aammalu KANKOKOKA-meersunik ataatsimeeqateqarneranit imaqarniliaq kiisalu Akileraartarnermut Akitsuusiisarnermullu Ataatsimiititaliap Akileraartarnermut Aqutsisoqarfimmeerunik 16. november 2009-mi ataatsimeeqateqarneranit imaqarniliaq.
- D. 2010-mi aningaasanut inatsisissatut siunnersuutip aappassaaneerreqarneranut Aningaasaqarnermut Ataatsimiititaliap isumaliutissiissutaa aammalu Aningaasaqarnermut Ataatsimiititaliap aningaasaliissuteqarnissamik suliaa 09-437 pillugit Peqqissutsimut Naalakkersuisup allagai 19. aamma 20. november 2009-meersut.
- E. Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup isumasioqatigalugu ulloq 19. november 2009-mi ataatsimeeqatiginissaanut aggeqqusissut aammalu Naalakkersuisunut ilaasortap oqaasissaasa allattorsimaffiat 20. november 2009-meersoq.
- F. Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup allagai 17. november 2009-meersut.
- G. Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup allagai 19. november 2009-meersut.
- H. Kultureqarnermut Ilinniartitaanermullu Ataatsimiititaliap Aningaasaqarnermut Ataatsimiititaliamut allagai 16. november 2009-meersut
- I. Efterskoliugallartut aningaasaqarnerat pillugu Kultureqarnermut Ilinniartitaanermullu Ataatsimiititaliap apeqqutaanut 2. november 2009-meersunut Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup akissutai 16. november 2009-meersut. (Ilanngussat atortussat Inatsisartut nittartagaatigut pissarsiarineqarsinnaapput).
- J. Aalisarnermut, Piniarnermut Nunalerinermullu Naalakkersuisumit allakkat 6. november 2009-meersut.
- K. Assartuineq inissiallu pillugit Ineqarnermut, Attaveqarnermut Angallanermullu Naalakkersuisumik ulloq 19. november 2009-mi ataatsimeeqateqarnermi saqqummiussat.
- L. Nunami Namminnermi Pissutsimut, Pinngortitamut Avatangiisinullu Naalakkersuisup allagai 13. november 2009-meersut.
- M. Aningaasaliissutinut Aningaasaqarnermut Ataatsimiititaliap allannguutissatut siunnersuutaanut missingersuutinut ilanngussat.
- N. Naalakkersuisut allannguutissatut siunnersuutaat nutaat kiisalu naqqiut 23. november 2009-meersoq

1. Aallaqqaasiut

2010-mi aningaasanut inatsisissatut siunnersuutip aappassaaneerneqarnissaanut Aningaasaqarnermut Ataatsimiititaliaq ulloq 6. november 2009-mi isumaliutissiissuteqarpoq.

Aningaasanut inatsisissatut siunnersuut Inatsisartunit pingasunngornermi ulloq 11. november 2009-mi aappassaaneerneqarpoq.

Kommunit aningaasaqarnerat pillugu KANUKOKA tallimannngornermi ulloq 13. november 2009-mi Aningaasaqarnermut Ataatsimiititaliamut sassartitaqarpoq.

Assartuineq inissallu pillugit ataatsimiinnermi Ineqarnermut, Attaveqarnermut Angallanermullu Naalakkersuisoqarfimmi sisamannngornermi ulloq 19. november 2009-mi ingerlanneqartumi Aningaasaqarnermut Ataatsimiititaliaq peqataavoq.

Aningaasanut inatsisissatut siunnersuummik Inatsisartut aappassaaneerinerat tunngavigalugu allannguutissatut siunnersuutininik allanik 73-inik Naalakkersuisut sisamannngornermi ulloq 19. november 2009-mi, nal. 14.25 nassiussipput.

Tamatuma saniatigut tallimannngornermi ulloq 20. november 2009, nal. 15.15 allannguutissatut siunnersuutininik allanik sisamanik Naalakkersuisut nassiussipput.

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmi sipaarutit pillugit Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisumik ataatsimiititaliaq arfininngornermi ulloq 21. november 2009-mi isumasioqateqarluni ataatsimeeqateqarpoq.

Akilerartarnermut akitsuusiisarnermullu tunngasuni isertitaqarnerussutininut sillimmatit pillugit Aningaasaqarnermut Naalakkersuisumik ataatsimiititaliaq ataasinngornermi ulloq 23. november 2009-mi isumasioqateqarluni ataatsimeeqateqarpoq.

Ataasinngornermi ulloq 23. november 2009, nal. 17.00 allannguutissatut siunnersuummik ataatsimik allamik, naqqiummik ataatsimik Naalakkersuisut nassiussipput allannguutissatullu siunnersuut ataaseq tunuartillugu.

Aammattaaq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit saaffiginnissutinik ilisimatitsissutinik arlalinnik Aningaasaqarnermut Ataatsimiititaliaq tigusaqarpoq.

Kiisalu aningaasanut inatsisissatut siunnersuutip aappassaaneerneqarneranut ataatsimiititaliap isumaliutissiissutaa tunngavigalugu Naalakkersuisunut ilaasortanit arlalinnit akissutinik ataatsimiititaliaq tigusaqarpoq. Akissutit taakku isumaliutissiissummut matumunnga ilanngussatut ilanngunneqarput aammalu pisariaqarnera naapertorlugu isumaliutissiissummi oqaaseqarfigineqarlutik.

Aningaasanut inatsisissatut siunnersuutip Inatsisartunit pingajussaaneerneqarnissaanut Aningaasaqarnermut Ataatsimiititaliaq matumuuna isumaliutissiissuteqarpoq.

2. Aningaasaqarnermut Ataatsimiititaliap apeqquatai/oqaaseqaatai aalajangersimasut – suliassaqarfinnut agguataarlugit

Aallarniutigalugu isumaliutissiisummut ilanngussat eqqumaffigeqquneqassapput.

2.1. Suliassaqarfik 20-24 Aningaasaqarnermut Naalakkersuisoq

Konto pingarneq 20.05.20 Kommuninut ataatsimoortumik tapiissutit

Tallimangornermi ulloq 13. november 2009-mi KANUKOKA-meersut Aningaasaqarnermut Ataatsimiititaliamut sassarput. Kommuninut ataatsimoortumik tapiissutit 2010-mit ikilineqarnissaat pillugu siunnersuummut kattuffiup isumaanik saqqummiussinissaq KANUKOKA-p taamaalilluni kissaatigaa.

Atortussat sassartitsinermi tunniunneqartut isumaliutissiisummut matumunnga ilanngussaq C-tut ilanngunneqarput. Aammalu KANUKOKA-p siulittaasuata oqaasiisa allattorsimaffiat ilanngussamut tassunga aamma ilanngunneqarpoq. Kiisalu Akileraartarnermut Akitsuusiisarnermullu Ataatsimiititaliap KANUKOKA-mik aammalu Akileraartarnermut Aqutsisoqarfimmik ataatsimeeqateqarneranit imaqarniliat marluk ilanngussamut tassunga ilanngunneqarput. Akileraartarnermut akiliisitsiniartarnermullu tunngasut kommuninut aningaasaqarnikkut sunniutaannik KANUKOKA-p naliliinera aammalu akileraarutinut pinngitsaaliisummillu akiliisitsissutit il.il. kingusinaartumik tunniunneqartarnerat pillugu Akileraartarnermut Aqutsisoqarfiup akissutaa imaqarniliani taaneqartuni immikkut nassuiaatigineqarput.

Ataatsimoortumilli tapiissutit siunnersuutigineqartutut ikilineqarnissaannut peqataanissamut kommunit piareersimanerat pillugu ataatsimiititaliami isummiumneqartut suli assigiinngillat.

Nunataa karsiata aningaasaqarnikkut inissisimanagera eqqarsaatigalugu kommunit, kommuninut ataatsimoortumik tapiissutit killilimmik ikilinerisigut Namminersorlutik Oqartussat aningaasaqarnerannut tapeeqataasariaqartut Aningaasaqarnermut Ataatsimiititaliami amerlanerussuteqartut, Inuiat Ataqtigiit aamma Demokraatit ilaasortaataat isumaqarput.

Akerlianilli aaqqissuusaaanermik iluarsaaqqinnerup eqqunneqarnerata kingorna kommunit sipaarnissamut peqquneqarnissaannut siusippallaartoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataat isumaqarput. Akerlianik aaqqissuusseqqinnerup kingorna ukiuni siullerni aningaasartuuteqarnerunissaq naatsorsuutigineqartariaqarpoq, tamannalu ilaatigut Bornholmimi kommuninik iluarsaaqqinnermit misilittakkanut naapertuuppoq. Akerlianik kommuninik iluarsaaqqinneq ingerlallualeriarpat kommunini allaffissornikkut sipaaruteqarnissaq taperserreqarsinnaavoq. Tamatuma saniatigut sipaaruteqarnerup kingunerisassai pillugit ilisimasaqarnerunissaq pisariaqartinneqarpoq, tassa minnerunngitsumik kommunit akileraarutitigut isertitaat pillugit KANUKOKA-mit Akileraartarnermullu Aqutsisoqarfimmit assortuuttumik oqariartuutit eqqarsaatigalugit suliaq qularnaatsumik isummerfigineqarsinnaanngimmat.

Kiisalu kommunit aningaasaqarniarnerat 2010-mi immikkut sammineqassasoq Aningaasaqarnermut Ataatsimiititaliap isumaqtigiittup aalajangiuppaa.

Allannguutissatut siunnersuutit pillugit isumaliutissiissummi immikkoortoq aamma innersuussutigineqarpoq.

2.2. Suliassaqarfik 34 Peqqissutsimut Naalakkersuisoq

Aappassaaneerinissamut Aningaasaqarnermut Ataatsimiititaliap isumaliutissiissutaani suliassaqarfik matumani pineqartoq pillugu allassimasut tunngavigalugit Peqqissutsimut Naalakkersuisoq ilassutitut paasissutissanik ulloq 19. november 2009-mi nassiussivoq. Allakkat ilanngussaq D-mut ilanngunneqarput.

Aningaasaqarnermut Ataatsimiititaliap aningaasaliissuteqarnissamik suliaa 09-437 tunngavigalugu Peqqissutsimut Naalakkersuisoq ulloq 20. november 2009 paasissutissanik nassiussivoq. Allakkat taakku aamma ilanngussaq D-mut ilanngunneqarput.

Ilanngussani taaneqartuni ilaatigut makku pillugit paasissutissat ilanngunneqarput:

- Suliaritinniarlutik utaqqisunik 2009-mi 2010-milu ikilisarneqarnerat.
- Konto pingaarneq 34.11.05, Imigassanik ajornartorsiuteqartunut katsorsaasarfiit.
- Deloitte Peqqinnissaqarfimmik misissuina, tak. kinguliiniittut.

Peqqinnissaqarfimmi aningaasaqarnermik aqqissuussaaneermillu Deloitte misissueqqissaarnera.

Deloitte Peqqinnissaqarfimmik misissuineranut nassuiaatit erseqqinnerusut Aningaasaqarnermut Ataatsimiititaliap qinnutigai. Deloitte isumaqatigiissuteqarfigineqarsimanersoq taamaattoqannginnersorluunniit pillugu imminut assortuuttunik nalunaaruteqartoqarneranik tamanna ilaatigut tunngaveqarpoq.

Maannangaq oqaasiinnartigut Deloitte isumaqatigiissuteqarfigineqarsimasoq aammalu allakkatigut isumaqatigiissut decemberip aallartinnerani atsiorneqassasoq naatsorsuutigineqartoq Naalakkersuisut maanna paasissutissiissutigaat. Isumaqatigiissutissatut missingiusiaq ataatsimiititaliamit tiguneqarpoq, taannalu ilanngussaq D-mut ilanngunneqarpoq. Isumaqatigiissutissatut missingiusiaq danskisuinnaq pigineqarpoq.

Peqqinnissaqarfimmi aningaasaqarnermik aqutsinerup kinguaasaanertaqanngitsumik nukittorsarneqartariaqarnera Peqqissutsimut Naalakkersuisup isumaqatigigaa Aningaasaqarnermut Ataatsimiititaliap iluarisimaarlugu maluginiarpaa. Peqqinnissaqarfup iluani aningaasaqarnermik aqutsinerup pitsanngorsarneqarnerani isumaqatigiissut tunngavissat ilaattut naleqquttuussasoq ataatsimiititaliap naatsorsuutigaa.

Peqqinnissaqarfimmi pissutsit pillugit Deloitte misissuinernek arlalinnik assigiinngitsunik ingerlataqarsorinarpoq. Misissuinernek taakkununga ataatsimut skemanngorlugu takussutissiamik nassiussinissaq Aningaasaqarnermut Ataatsimiititaliamit **qinnutigineqarpoq**, tassani makku allassimassallutik:

- Misissuinerup siunertaa
- Piffissaliussat
- Missingersuutit
- Ulloq isumaqatigiissummik atsiorfissaq (naatsorsuutigisaaq).

2.3. Suliassaqarfik 40 Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq

Ulloq 19. november 2009-mi isumasioqatigiilluni ataatsimeeqatigiinnissamut Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq Aningaasaqarnermut Ataatsimiititaliamit aggersarneqarpoq. Ulloq 19. november 2009-mi isumasioqatigiilluni ataatsimiinnissamut aggeqqusissut Naalakkersuisunullu ilaasortap oqaasissaasa allattorsimaffiat 20. november 2009-mik ullulernerqarsimasoq ilanngussaqaq E-mut tamarmik ilanngunneqarput.

Aningaasaqarnermut Ataatsimiititaliap aappassaaneerinermit isumaliutissiissutaani suliassaqarfik matumani pineqartoq pillugu allassimasut tunngavigalugit ilassutitut paasissutissanik Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq ulloq 17. november 2009-mi nassiussivoq. Allakkat ilanngussaqaq F-imut ilanngunneqarput.

KIIN-ip aqqissugaanerani allangortitsineq

Inuussutissarsiutinut ilinniartitaanerit Suliffeqarnermut Inuussutissarsiutinullu taamani Naalakkersuisoqarfimmit KIIN-imut uterteqqinneqarnissaat pillugu aalajangiinnissamut tunngavissiaaqqartup nassiunneqarnissaa Aningaasaqarnermut Ataatsimiititaliap iluatsitsiffiunngitsumik arlaleriarluni qinnutigigaluarpa.

Tamanna Naalakkersuisumut ilaasortamik isumasioqateqarluni ataatsimeeqateqarnermi ataatsimiititaliap kingullermik qinnutigaa. Naalakkersuisunullu siulittaasup suliassaqarfinnik agguataarisinnaatitaanera Naalakkersuisunut ilaasortap innersuussutigiinnarpaa. Taama pisinnaatitaaneq ataatsimiititaliamit assortorneqanngilaq aammalu assortorneqarsimanani. Inuussutissarsiutinullu ilinniartitaanerit Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmut utertinneqarnerannut tunngavigineqartumik nassuiaatigineqanngitsumik paasitinneqarnissani ataatsimiititaliap kissaatigisimavaa. Oqaatigineqartariaqarporli Naalakkersuisunut ilasortap apeqqut taanna akisinnaasimangikkaa. Tamannalu naammaginangilluinnartutut isigineqartariaqarpoq.

2008-mut tunngasumik ajornartorsiut

Meeqqat atuarfiannik naammassinnillutik 2005-imit 2009-mut qimatsisut ilinniakkamillu piareersaataasumik inuussutissarsiutinulluunniit ilinniartitaanermik aallartitsisimasut qassiunerat allakkami, ilanngussaqaq F-mut ilanngunneqartumi, Naalakkersuisunut ilaasortap nassuiaateqarfigaa. Piffissami allassimasumi inuusuttut ilinniarnermik ingerlatsisut agguaqatigiissillugu ukiumut 2 procentit missaannik amerliartorsorinarput. Sulisinnaasut 2/3-iisa 2020-mi piginnaassusiliisumik ilinniagaqarsimanissaannik ilinniartitaanermut pilersaarummi anguniagaq anguneqassappat tamanna naammannersoq Naalakkersuisunut ilaasortamit nalilerneqaqqullugu Aningaasaqarnermut Ataatsimiititaliap qinnutigaa. Ulloq 21. november isumasioqatigiilluni ataatsimeeqatigiinnermi Naalakkersuisunut ilaasortap paasissutissiissutigaa tamaattoqarnissaa naatsorsuutigineqartoq. Naak qularutigilaaraluarlugu paasissutissaq taanna Aningaasaqarnermut Ataatsimiititaliap tusaatissatut tiguaa.

Tamatuma saniatigut inuusuttut meeqqat atuarfiannik qimatsinermik kingorna ilinniakkamik sorlermik toqqaanerannik ingerlariaqqinnerannillu sukumiisumik nalunaarsuineq aallartinneqassasoq Naalakkersuisunut ilaasortap isumasioqatigiilluni ataatsimiinnermi paasissutissiissutigaa. Tamanna inuusuttut ilinniarnermik aallartitsisut amerlisarneqarnissaannut tunaartaqarnerusumik iliuuseqarnissamut pitsaanerusumik tunngavissiisussatut naleqquttut naatsorsuutigineqarpoq. Taama iliuuseqarnissaq pitsaalluinnartut Aningaasaqarnermut Ataatsimiititaliamit isigineqarpoq.

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup suliassaqarfiani allaffissornikkut sipaarutissat

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmi allaffissornikkut sipaarutissat angusassatut missingersuutigineqartut ajorseriarnerannik kinguneqarnerat eqqumiigigini Aningaasaqarnermut Ataatsimiititaliap aningaasanut inatsisissatut siunnersuutip aappassaaneerneranut ataatsimiititaliap isumaliutissiissutaani immikkoortoq 3.7-imi oqaatigaa. Tamanna ataatsimiititaliamit naammagineqanngilaq. Tamanna tunngavigalugu suliaq pillugu Naalakkersuisunut ilaasortaq ataatsimiititaliap isumasioqatigalugu ataatsimeeqatigaa. Suliassaqarfimmi matumani pineqartumi sipaaruteqarnissamut periarfissaqarnerisooq isumasioqatigiilluni ataatsimiinnermi ataatsimiititaliap sukumiisumik qulaajarniarsaraa.

Siunnersuutigineqareersut saniatigut allaffissornikkut sipaarutissat allat Naalakkersuisoqarfiup nammassinnaanngikkai akissuteqaatikkut isumasioqatigiilluni ataatsimiinnermi saqqummiunneqartukku uppernarsinneqanngitsoq ataatsimiititaliaq isumaqarpoq.

Taamaattumik Namminersorlutik Oqartussat allaffissornermut aningaasartuutaannik appartitsinissamik anguniagaqarnerup aalajangiusimaneqarnissaa siunertaralugu allannguutissatut siunnersuummik Aningaasaqarnermut Ataatsimiititaliaq saqqummiussivoq. Taamaalilluni ingerlatsiviit qitiusut, soorlu Isumaginnittoqarfiup Peqqinnissaqarfiullu sipaarutissaasa (minnerpaamik) annertoqataannik Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup sipaaruteqarsinnaannginnera illersorneqarsinnaanngitsoq ataatsimiititaliaq isumaqarpoq. Taamatuttaaq kommunitut piomasaaqatigineqartut assigalugit Namminersorlutik Oqartussat allaffissornikkut sipaaruteqassasut ataatsimiititaliap kissaatigaa.

Ilanngussaq E kiisalu ilassutitut isumaliutissiissummi immikkoortoq 3.11 aamma innersuussutigineqarput.

Konto pingaarneq 40.10.12 Efterskolit

Efterskoliugallartut aningaasaqarnikkut inissisimanerat pillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisumut Kultureqarnermut Ilinniartitaanermullu Ataatsimiititaliap apeqqutaasa akissutillu nuutinnerannik Aningaasaqarnermut Ataatsimiititaliaq tigusaqarpoq. Apeqqutitut ilaatigut højskolit efterskoliugallartunik ingerlatsinerat, tassungalu atatillugu aningaasartuutitut tunngasut pillugit Deloittemit nalunaarussiaq ilanngunneqarsimavoq. Ilanngussaq I innersuussutigineqarpoq.

Konto pingaarneq 40.10.15 Atuarfimmi nerisaqartitsineq

Kontomi pingaarnermi matumani 2010-mi 1 mio. kr.-inik sipaaruteqarnissaq Kultureqarnermut Ilinniartitaanermullu Ataatsimiititaliamit inassutigineqarpoq. Tamanna Aningaasaqarnermut Ataatsimiititaliamit taperserineqarpoq. Ilanngussaq H innersuussutigineqarpoq.

Konto pingaarneq 40.91.05 Iluarsartuussinermit ilinniartitaanerit

Naluneqanngitsut aatsitassarsiornermut entreprenørinullu tunngasumik ilinniartitaanerit ukiumoortumik 2 mio. kr.-it tikillugit sipaaruteqarfigineqarnissaat Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup anguniarpaa. Aappassaaneerinissamut Aningaasaqarnermut Ataatsimiititaliap isumaliutissiissutaa tunngavigalugu sipaarutissat taakku Kultureqarnermut Ilinniartitaanermullu Ataatsimiititaliap erseqqinnerusumik apeqquteqarfigai.

Ilanngussaq G innersuussutigineqarpoq.

Konto pingaarneq 40.91.08 Inuussutissarsiutinut ilinniartitaanerit ataanni ilinniarfiit

Angallatini naalagannornianik ilinniartitaanerup Danmarkimut nuunneqalersaarnera isumakulunnartillugu Aningaasaqarnermut Ataatsimiititaliap aappassaaneerinissamut isumaliutissiissummi oqaatigaa. Taamaattumik nuussinerup 2010-mi ingerlanneqannginnissaa ataatsimiititaliamit iluarisimaarneqarpoq. Taamaaliornikkut ilinniartitaanerit nunatsinni ingerlatiinnarneqarsinnaanersut misissuiffigineqaaqaa. Taamaaliornikkut ilinniartitaanerit nunatsinni ingerlatiinnarneqarsinnaanersut misissuiffigineqaaqaa.

Suliap taassuma ingerlanera pillugu Kultureqarnermut Ilinniartitaanermullu Ataatsimiititaliap ingerlaavartumik ilisimatinneqartarnissaa Aningaasaqarnermut Ataatsimiititaliamit **qinnutigineqassaaq.**

Ilanngussaq H innersuussutigineqarpoq.

Konto pingaarneq 40.90.12 Radioqarnermut TV-qarnermullu ataatsimiititaliap

Radioqarnermut TV-qarnermullu ataatsimiititaliap atorunnaarsinneqarnissaa Kultureqarnermut Ilinniartitaanermullu Ataatsimiititaliamit inassutigineqarpoq, tassa ataatsimiititaliap ingerlatai aningaasartuutinut nallersuutinngimmata. Tamanna Aningaasaqarnermut Ataatsimiititaliamit taparserneqarpoq. Ilanngussaq H innersuussutigineqarpoq.

Konto pingaarneq 40.94.10 Aviisit nuna tamakkerlugu saqqummertartut assartorneqarnerinut aningaasartuutinut nuusiorfiillu NCB-p akiliutaannut matusissutissatut tapiissutit

Allannguutissatut nr. 211 innersuussutigineqarpoq, tak. ilassutitut isumaliutissiissummi immikkoortoq 3.1. Aviisit nuna tamakkerlugu saqqummertartut nassiussorneqarnerannut tapiissuteqartarnerup ingerlatiinnarneqarnissaanut aningaasanik immikkoortitsinissaaq allannguutissatut siunnersuummi taaneqartumi siunnersuutigineqarpoq.

2.4. Suliassaqarfik 50-51 Aalisarnermut, Piniarnermut Nunalerinermullu Naalakkersuisoq

Aappassaaneerinissamut Aningaasaqarnermut Ataatsimiititaliap isumaliutissiissutaa suliassaqarfik matumani pineqartoq pillugu allasimasut tunngavigalugit Aalisarnermut, Piniarnermut Nunalerinermullu Naalakkersuisoq ilassutitut paasissutissanik ulloq 6 november 2009-mi nassiussivoq. Allakkat ilanngussaq J-mut ilanngunneqarput.

Konto pingaarneq 50.01.01 Aalisarnermut, Piniarnermut Nunalerinermullu Naalakkersuisoqarfik

Umimmannik tammajuitsussanik piniartitsisarnerit Ilulissat eqqaanni Naternami aallartinneqartussatut pilersaarutigineqartut Naalakkersuisunit paasissutissiissutigineqarpoq. Naternaq Aasiaat eqqaaniittoq oqaatigineqarpat eqqornerussasoq Aningaasaqarnermut Ataatsimiititaliamit erseqqissaatigineqassaaq.

Konto pingarneq 50.01.20 Aalisarneq Piniarnerlu

Misileraalluni aalisarnissamut kontomi pingarnermi matumani 500.000 eurot EU-mit immikkoortinneqarsimangitsut Naalakkersuisunut ilaasortap allakkiami ilanngussaq J-imut ilanngunneqartumi paasissutissiissutigaa. Aningaasat taakku kontomi pingarnermi 50.01.17-imi, Aalisarneq pillugu EU-mik isumaqatigiissummut tunngasumi, immikkoortinneqartut Naalakkersuisunut ilaasortap paasissutissiissutigaa.

Kontomi pingarnermi 50.01.20-mi, Aalisarnermut Piniarnermullu tunngasumi, suliassamut takussutissiaq Aningaasaqarnermut Ataatsimiititaliamit innersuussutigineqartariaqarpoq, tassani ima allassimalluni:

Suliassami kisitsisit (1.000 kr. -inngorlugit)	N 2008	AI 2009	AIS 2010	M 2011	M 2012	M 2013
Tuukkat qaartartullit	335	500	500	500	500	500
Aalisarnermi suliniutit	336	108	108	108	108	108
Misileraalluni aalisarneq (EU-mik isumaqatigiisut)	3.806	3.807	3.807	3.807	3.807	3.807
Piniarnermi suliniutit	100	108	245	245	245	245

Taamaalilluni Aningaasaqarnermut Ataatsimiititaliap Naalakkersuisunut ilaasortamut nalunaarutigissavaa konto pingarnermi 50.01.17-imi, Aalisarneq pillugu EU-mik isumaqatigiissummut tunngasumi pineqartut tassaammata *isertitanut aningaasaliissutit*, tassanilu EU-p aalisarnermut akiliutai isertitarineqartarlutik. Taamaalilluni misileraalluni aalisarnermut aningaasartuutit konto pingarneq manna aqutigalugit aningaasartuutigineqartarput.

2.5. Suliassaqarfik 70-73 Ineqarnermut, Attaveqarnermut Angallannermullu Naalakkersuisoq

Ulloq 19. november 2009-mi ataatsimiinnermi Ineqarnermut, Attaveqarnermut Angallannermullu Naalakkersuisumit aaqquunneqartumi Aningaasaqarnermut Ataatsimiititaliaq peqataavoq. Ineqarnermut Angallannermullu tunngasuni suliniutit ingerlanneqartut aallartinneqassamaartullu arlallit pillugit takussutissiamik Naalakkersuisunut ilaasortaq ataatsimiinnermi saqqummiussivoq. Ilanngussaq K innersuussutigineqarpoq.

Ineqarnermut tunngasuni ilaatigut makku pillugit paasissutissat ataatsimiinnermi ataatsimiititaliamit pissarsiarineqarput:

- Illuut A/S
- Ineqarnermut akiliutinik iluarsaaqqinneq
- Nuttarnerulersitsiniarluni iliuitsit
- Pisariaqartitsineq aallaavigalugu naliliineq tunngavigalugu taarsigassarsianik tapiissutinillu allannqortitsinerit

Angallannermut tunngasuni ilaatigut makku pillugit paasisutissat ataatsimiinnermi ataatsimiititaliamit pissarsiarineqarput:

- Nunatsinni angallannermut periusissap ilisaritinneqarnera.
- Angallannermut isumalioqatigiissitaq attaveqarnerlu
- RAB-p nunaqarfinnut angallatai nutaat

Konto pingaarneq 73.01.15 Usinik assartuineq

Royal Arctic Bygdeservicep nunaqarfinnut angallatissanik nutaanik pisinissaa pillugu Angaasaqarnermut Ataatsimiititaliap aappassaaneerinissamut isumaliutissiissutaani ataatsimiititaliaq ilaatigut ima allappoq:

” RAB ’ip angallatissai nutaat

Usinik assartuutissatut angallatinik nutaanik RAB-ip (Royal Arctic Bygdeservice) pisinissamik naatsorsuutiginninnera Aningaasaqarnermut Ataatsimiititaliamit arlalinnik apeqquteqarfigineqarpoq. Tassunga atatillugu suliamut tunngaviusumik isummernini imaattoq ataatsimiititaliap saqqummiuppaa:

”Nunaqarfinnut angallatinik nutaanik pisineq atuisut toqqaannartumik akiuleqartinnerisigut aammalu ersarissumik ingerlanneqarnissaanik qulakkeerilluni sapinngismik pisariaqartoq [-poq] ... Suliffeqarfiup iluani tapiiffigeqatigiittarneq ingerlanneqassanngilaq. Tassunga atatillugu inuiaqatigiit aaqqissugaanerat pillugu iliuusissatut pilersaarutit ukiut qulikkaat aallartinneranneersut innersuussutigineqarput.”

Ataatsimiititaliap isummernermi tunuliaqutigisaanut tamakkiisumik tapersiinertik Naalakkersuisut oqaatigaat, tamannalu Naalakkersuisut suliamik isumaliutiginneqqinneranni matuma kingorna aallaaviusussatut isigineqarpoq.

Aningaasaliissutinut akileeqataassutinik akiliuteqartitsisarnikkut angallatit tamakkiisumik aningasalersorneqarnissaat Naalakkersuisut siunnersuutigigaat ataatsimiititaliap soqutigalugu maluginiarpaa. Tamatumani pineqarluni assartuinnermut akiliuteqarnermi aningaasanik angallatinik pisinermi aningaasartuutinut matussutissanik immikkut akileequssuteqartarnissaq. Tamanna angallatinik ersarissumik toqqaannartumillu aningaasalersuineruvoq, naammaginarluinnartutullu oqaatigisariaqarluni.”

Aningaasaqarnermulli Ataatsimiititaliamik ataatsimeeqateqarnermi Naalakkersuisunut ilaasortap paasisutissiissutigaa atuisut toqqaannartumik akiliuteqartinnerisigut nunaqarfinnut angallatinut nutaanut akiliinissaq naatsorsuutigineqarunnaartoq. Tamatumunnga taarsiullugu Arctic Umiaq Linep (AUL) Altantikoq ikaarlugu nunatsinnilu angallassineralani usinik assartuinnermut akigitat qaffannerisigut angallatit aningaasalersorneqarnissaat Naalakkersuisunut ilaasortap siunnersuutigaa. Tamatuma kingunerissavaa avannaani nunaqarfinni nioqutissat atortussallu akiisa qaffatsaaliorneqarnissaat siunertaralugu assersuutigalugu Narsami Nuummilu ilaatigut ulluinnarni nioqutissat sanaartormullu atortussat akiinik qaffaanissaq.

Taamatut tapiiffigeqatigiittarnermik ingerlatsinikkut *inuiaqatigiit aaqqissugaanerat pillugu iluusissatut pilersaarutissatut siunnersuummi* anguniakkat siornatigut aalajangersarneqartut Naalakkersuisunit qimakkiartuaarneqarput (Immikkoortoq 2.2):

”

- Tamatumani aallaqqaatitut Naalakkersuisut suliariniarpaat imaatigut usinik assartuinnerup allanngortiternissaa ukunatigut:

- *Usinik assartuinermi peqqussutip allanngortinnera, usinik assartuinermi akit assigiissuunissaannut akileraarutip atorunnaarsinnera ilanngullugu.*
- *Royal Arctic Bygdeservice A/S-imut sullissinikkut isumaqatigiissutip annikilliliiviginera.*
- *Nunatsinni tunisassanik usinik assartuinermi tapiissutit atorunnaarsinnerarneri.*
Nuna tamakkerlugu usinik assartuinermi akit nutaat aningaasartuuterpianik tunngaveqarnerusut atulersillugit.”.

Tamanna Aningaasaqarnermut Ataatsimiititaliamit maluginiarneqarpoq aalajangiisoqartinnagulu tamanna pillugu innuttaasut sukumiisumik oqallitsinneqarnissaat kaammattuutigineqarluni, tassa aningaasalersueriaaseq sorleq toqarneqaraluarpulluunniit tunngaviusumik aalajangiinissaq innuttaasunut sunniuteqartussaq pineqarmat.

Naalackersuisunut ilaasortamik ataatsimeeqateqarnermi Kalaallit Nunaanni angallannermut periusissaq COWI-mit ineriartortinneqartoq ataatsimiititaliamut takutinneqarpoq. Angallannermut assigiinngitsumik aningaasaliissuteqarnikkut inuiaqatigiit aningaasaqarnerannut iluanaarutissat (annaasaqaatissalluunniit) periutsikkut qanoq naatsorsorneqarsinnaanersut ilaatigut takutinneqarpoq. Angallannermut periusissaq taanna angallannikkut siunissami iliuusissat aningaasaliissutissallu pilersaarusiorneranni sakkussatut pitsaalluinnartutut ataatsimiititaliamit isigineqarpoq.

Taamaattumik angallannermut periusissaq aqutigalugu RAB-imut angallatinik nutaanik pisinissap naliliiviginissaanut angallannermut isumalioqatigiissitaq periarfissinneqarnissaa Aningaasaqarnermut Ataatsimiititaliap saneqqunneqarsinnaanngitsutut isigaa. Angallatinik pisinermi piumasaqaatit angallatillu pisinnaassusiat naliliinermi tassani ilanngunneqartariaqarput. Tamanna angallatinik pisinissap akuerineqarnera Naalackersuisunit RAB-imut *nalunaarutigineqartinnagu* soorunami pisariaqarpoq. Tamatuma pinissaa Aningaasaqarnermut Ataatsimiititaliamit **kaammattuutigineqarpoq**.

2.6. Suliassaqarfik 77 Nunami Namminermut Pissutsinut Naalackersuisoq

Siunertamut konto 77.05 Avatangiisit Pinngortitarlu

Eqqagassalerinermut pilersaarut

Eqqagassalerinermut pilersaarut 2010-mi atuutsinneqalissanngitsoq Aningaasaqarnermut Ataatsimiititaliap paasivaa. Tamanna ajuusaarnartutut ataatsimiititaliamit isigineqarpoq. Eqqagassalerinermulli pilersaarutip ukiut tamaasa kinguartinneqartarnera ingerlaannarsinnaanngitsoq ataatsimiititaliaq naliliivoq.

Taamaattumik 2011-mi aningaasanut inatsisissatut siunnersuummut pilersaarut salliutillugu ilannguteqqullugu Naalackersuisut ataatsimiititaliamit **kaammattorneqarput**. Eqqagassalerinermulli pilersaarutip inatsisissatut siunnersuummut ilanngunneqarsimanerata paasinissaa siunertaralugu aningaasanut inatsisissatut siunnersuutip augustip qaammataani saqqummiunneqarnissaata utaqqiinnarneqarnissaa ataatsimiititaliamit kissaatigineqanngilaq. Taamaalilluni aningaasanut inatsisissatut siunnersuut Naalackersuisoqarfiit akornanni naammassillugu isumaqatigiinniutigineqareersimappat eqqagassalerinermut pilersaarutip taama aningaasartuuteqaataatigisussap inissaqartinneqarnissaa ilimananngilaq.

Taamaattumik eqqagassalerinermut pilersaarutip 2011-imi aningaasanut inatsisissatut siunnersuummi pingaarnersiuilluni tullerriarinermit ilanngunneqarnissaanut 2010-mi junip aallartinnerani suliniutigineqartut periarfissallu pillugit ilisimatitsissummik Naalakkersuisut **ulloq 10. juni 2009-mi** nassiussinissaat Aningaasaqarnermut Ataatsimiititaliamit **kaammattuutigineqarpoq**. Naalakkersuisut ilisimatitsissutaat Aningaasaqarnermut Ataatsimiititaliamut taamatullu Eqqissimatitsinermut Avatangiisinullu Ataatsimiititaliamut nassiunneqassasoq qinnutigineqarpoq.

Konto pingarneq 77.02.01 Kommuninut Nakkutilliisoqarfik

Narsami kommunalbestyrelsiusimasup kommunit kattussuunnissaat sioqqutitsiarlugu aningaasaqarnikkut iliuuserisimasai pillugit ilassutitut paasissutissat Nunamut Namminermit, Pinngortitamut Avatangiisinullu Naalakkersuisup 13. november 2009-mi allagaqarneratigut ataatsimiititaliamit tiguneqarput. Ilanngussaq L innersuussutigineqarpoq.

Narsami kommunalbestyrelsiusimasoq kommunimut annaasaqaataasumik ilumut iliuuseqarsimanersoq qularutissaanngitsumik oqaatigineqarsinnaanngitsoq Nakkutilliisoqarfiup allatseqarfiata nalileraa Naalakkersuisunut ilaasortap paasissutissiissutigaa. Taamaattumik kommunalbestyrelsimi ilaasortat taarsiissuteqarnissamut akisussaatinneqarnissaanut tunngavissaqanngitsoq Nakkutilliisoqarfik isumaqarpoq.

Tamatuma kingorna aningaasaliissutinut tunngasumik apeqqut naammassineqartutut isigineqartariaqarmat suliap ingerlateqqinneqarnissaanut tunngavissaqanngitsoq Aningaasaqarnermut Ataatsimiititaliaq isumaqarpoq, matumalu kingorna suliaq Inatsisartut Inatsisit Atortinneqarnerannut Ataatsimiititaliaannit malitseqartinneqartussanngortinneqarpoq.

2.7. Suliassaqarfik 80-89 Ineqarnermut, Attaveqarnermut Angallannernullu Naalakkersuisoq

Illuutiqatigiiffik Illuut A/S

Illuut A/S-ip pilersinneqarnissaanut inatsisitigut tunngavissamik nutaamik Naalakkersuisut siunnersuuteqarput, tak. allannguutissatut siunnersuut nr. 282.

Missingersuusiornermut inatsit naapertorlugu aningaasanut inatsimmi oqaasertaliussat inatsisip oqaasertarigaat Aningaasaqarnermut Ataatsimiititaliamit oqaatigineqassaaq. Taamaattumik Illuut A/S inatsisit tunngavigalugit pilersinneqartoq oqaatigineqassaaq. Tamatumali peqatigisaanik Aningaasaqarnermut Ataatsimiititaliamit erseqqissarneqassaaq aningaasanut inatsimmi oqaasertaliussat inatsisunik ataavartumik allannguinnissamut atorneqarnissaat siunertaanngimmat. Allannguutit taamaattut immikkoortunut inatsisini ingerlanneqartassapput.

Taamaattumik Inatsisartut inatsisaannik suliarinninneq Naalakkersuisunit nukinginneqaaqqullugu Aningaasaqarnermut Ataatsimiititaliamit **kaammattuutigineqarpoq**, tassani aalajangersakkat Illuutip pilersinneqarneranut atuunneranullu maleruagassiisut ilanngunneqassallutik. Oqaasertaliussat sanaartornermut suliassaqarfimmi ingerlatanut ullumikkut maleruagassiisut sapinngisamik amerlanerpaat inatsimmut tassunga ilanngunneqartariaqarput. Naalakkersuisut kingusinnerpaamik UKA 10-mi inatsisissatut siunnersuummik Inatsisartunut saqqummiussinissaat ataatsimiititaliamit naatsorsuutigineqarpoq.

3. Aningaasaliissutitut allannguutissatut siunnersuutit

Aningaasanut inatsisissatut siunnersuummut allannguutissatut siunnersuutitut nutaanik 77-inik Naalakkersuisut saqqummiussipput. Taakkunannga aqqanillit oqaasertaliussanut allannguutissatut siunnersuutaallutik.

Tamatuma saniatigut aningaasaliissutitut allannguutissatut siunnersuutitut tallimanik aammalu oqaasertaliussanut allannguutissatut siunnersuummik ataatsimik Aningaasaqarnermut Ataatsimiititaliaq saqqummiussivoq.

Aningaasaliissutitut allannguutissatut siunnersuutit sammisanut ukununga immikkoortinneqarsimapput:

- sammisaq 5 Aningaasartuuteqarnerunissamik kissaatit: allannguutissatut siunnersuutit 13-it
- sammisaq 11 Pingajussaaneerinninnissamut teknikkikkut allannguutit: allannguutissatut siunnersuutit qulingiluat
- sammisaq 12 Pingajussaaneerinninnissamut sanaartornermi nussuineq: allannguutissatut siunnersuutit pingasut
- sammisaq 13 Akitsuutit atuinermilu akiliutit: allannguutissatut siunnersuutit marluk
- sammisaq 14 Pingajussaaneerinninnissamut missingersuutitut sunniuteqanngitsumik allannguutit: allannguutissatut siunnersuutit sisamat
- sammisaq 15 KIIIN-imi allaffissornikkut utaqqiisaasumik ineqartitsinermit sipaarutit: allannguutissatut siunnersuutit 15-it
- sammisaq 16 Ingerlatsinermi ileqqaarutit: allannguutissatut siunnersuutit sisamat
- sammisaq 17 Sanaartornermi ileqqaarutit: allannguutissatut siunnersuutit arfineq pingasut
- sammisaq 18 Pingajussaaneerinninnissamut isertitaqarnerunissamik inatsisitigullu aningaasartuutitut pisussaaffigisanit naatsorsuutit: allannguutissatut siunnersuutit sisamat
- sammisaq 22 AUL-imut tapiissutit taakkulu aningaasalersornerat: allannguutissatut siunnersuutit sisamat
- sammisaq 23 Aningaasaqarnermut Ataatsimiititaliap allannguutissatut siunnersuutai: allannguutissatut siunnersuutit tallimat

Aningaasanut inatsisissatut siunnersuummik Inatsisartut pingajussaaneerineranni sammisat 1-4, 6-10 aamma 19-21 ataanni allannguutissatut siunnersuutitut saqqummiussisoqanngilaq.

Naalakkersuisut aningaasaliissutitut allannguutissatut siunnersuutaat nr. 211-imit nr. 273-imut kiisalu nr. 284-imit nr. 287-imut *normoqarput*. Saqqummiussinerup kingorna allannguutissatut siunnersuut nr. 212 Naalakkersuisunit tunuartinneqarpoq. Taamaattumik normup taassuma ataani allannguutissatut siunnersuummik saqqummiussisoqanngilaq.

Aningaasaliissutit pineqartillugit allannguutissatut siunnersuutit ataasiakkaat normui *aningaasaliissutitut takussutissiimi* allassimapput; ilanngussaq 1. Aningaasaliissutitut takussutissiit Naalakkersuisut allannguutissatut siunnersuutaannut saarlinngorlugit ilanngunneqarput, taakkulu ilassutitut isumaliutissiisummut ilanngussaq A-tut aammalu B-tut ilanngunneqarlutik.

Oqaasertaliussanut tunngatillugu normuliunneqartoq oqaasertaliussat siornagut allanneqarpoq. Oqaasertaliussat *ilanngussaq* 2-mik taaguuserneqarput. Taakku Naalakkersuisut aningaasaliissutitut allannguutissatut siunnersuutaat peqatigalugit ilassutitut isumaliutissiisummut ilanngussaq A-p ataani ilanngunneqarput.

3.1 Sammisag 5 – Aningaasartuuteqarnerunissamik kissaatit

Qulequttami tassani allannguutissatut siunnersuutitut 13-inik Naalakkersuisut saqqummiussipput. Allannguutissatut siunnersuutit taakku IST-p ataatsimut inerneranut 2010-mi 67.869.000 kr.-inik aammalu 2011-imi 33,9 mio. kr.-inik, 2012-imi 32,9 mio. kr.-inik 2013-imilu 31,4 mio. kr.-inik *ajorseriaataassapput*.

Ilaatigut illoqarfiit nunaqarfiillu ilaanni suliniutit immikkut ittunut sillimmatit ingerlatiinnarneqarnissaannut aammalu peqqinnissaqarfimmut innarluutilinnullu tunngasuni aningaasartuutissatut missingikkat qaffanneqarnerannut allannguutissatut siunnersuutit tunngapput.

Kontomut pingaarnermut 10.10.10-mut, Naalakkersuisunut tunngasumut, allannguutissatut siunnersuut nr. 212 tunuartinneqarmat maluginiaqquneqarpoq.

Sammisag 5-ip ataani allannguutissatut siunnersuutit nr. 211 aamma 213-imit 224-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigiumaneqarput.

Konto pingarneq 10.06.24 Utaqqisaagallartumik nuna tamakkerlugu aviisinut tapiissut

Aviisit nuna tamakkerlugu saqqummertarnissaasa qulakkeerneqarnissaat siunertaralugu 2010-mi 1.500.000-inik aamma 2011-imi 2012-imilu 1,5 mio. kr.-inik aningaasaliissuteqarnissaq Naalakkersuisut siunnersuutigaat.

(Allannguutissatut siunnersuut nr. 211)

Konto pingarneq 10.10.10 Naalakkersuisut

2010-mi 300.000-inik ukiunilu missingersuusiorfiusuni tamani 0,3 mio. kr.-inik aningaasaliissuteqarnissaq Naalakkersuisut siunnersuutigaat. Inissiani attartortittakkani, tassungalu ilanngullugit Naalakkersuisunut ilaasortat atorfimminnut atatillugu inissiaanni ineqarnermut akiliutinik qaffaanissamik Inissiatileqatigiiffiup INI A/S-ip ilimasaaruteqarnerata kingunerisaanik siunnersuut saqqummiunneqarpoq.

Aningaasarsiaqartitsinermut inatsimmi § 6, imm. 5 ima oqaasertaqarpoq:

Imm. 5. Inatsisartut siulittaasuat Naalakkersuisullu siulittaasuat akeqanngitsumik ineqartinneqassapput. Naalakkersuisuni ilaasortat sinnerinut atorfimmut atasumik ineqartitsisoqassaaq, taakkunanilu inissiat Namminersornerullutik Oqartussat atorfimmut atasumik pinngitsoorani inigisassatut inigittagaanni ineqarnermut akiliutinik naatsorsuisarnermi maleruagassat qanoq ilisukkulluunniit atuuttut naapertorlugit ineqarnermut akiliuteqartitsisoqassalluni.

Taamaalilluni Aningaasaqarnermut Ataatsimiititaliap paasinninnera malillugu INI-p ineqarnermut akiliutinik qaffaanera kontomi pingaarnermi Naalackersuisunut tunngasumi amigartooruteqarnermik kinguneqassaaq, tassa Naalackersuisunut ilaasortat ineqarnermut akiliutaat maleruagassat allat malillugit aalajangersagaammata, INI-li maleruagassat allat atorlugit ineqarnermut akiliuteqartitsilluni¹. Taamaakkaluortoq allannguutissatut siunnersuummik matuminnga akuersissutiginnineq innuttaasunut pitsaanngitsumik oqariartuuteqarnermik kinguneqassasoq ataatsimiititaliaq isumaqarpoq. Taamaattumik allannguutissatut siunnersuut una ataatsimiititaliamit akuerineqarsinnaanngilaq.

Inatsimmi aalajangersagaq siuliani issuarneqartoq naapertuutinnngilluinnartut Aningaasaqarnermut Ataatsimiititaliamit isigineqarpoq. Naalackersuisunut ilaasortap Naalackersuisunut ilaasortannornerminut atatillugu ineqarnermut marloqiusamik aningaasartuuteqarnerminut *taartisiaqarallarsinnaanera* ataatsimiititaliap tunngaviusumik isigalugu tapersersinnaavaa. Tamatumali peqatigisaanik Naalackersuisunut ilaasortat ineqarnermut annikitsuaqqamik akiliuteqartinneqarnerisigut Nuummi najugaqartussaataitanerannut taarsiissuteqarnissaq taarsiissuteqartariaqarnerluunniit ataatsimiititaliamit *akuerineqarsinnaanngilat*. Tassunga atatillugu Naalackersuisunut ilaasortatut atuuffiup *nammineq piumassuseq* naapertorlugu atuuffiunera ataatsimiititaliamit pingaartinneqarpoq. Taamatuttaaq Naalackersuisunut ilaasortat aningaasarsiaasa annertussusiat eqqarsaatigalugu annikitsuinnarmik ineqarnermut akiliuteqartitsinissaq pisariaqalersinngilaat.

Taamaattumik aningaasarsiaqartitaanermut inatsisip nutarterneqarnissaani allannguutissatut kissaatit siuliani allassimasut ilannguteqqullugit Inatsisartut Siulittaasoqarfiat Aningaasaqarnermut Ataatsimiititaliamit **kaammattorneqarpoq**, taamaalilluni Namminersorlutik Oqartussat illuutaannik attartortitsinermi maleruagassat assingi aallaavigalugit naatsorsorneqartumik Naalackersuisunut ilaasortat siunissami ineqarnermut akiliuteqartalersillugit. Tamatuma peqatigisaanik Naalackersuisunut ilaasortat tamatumunnga aningaasaqarnikkut ataavartumik taarsiuteqarfigineqarnissaat pisariaqartutut ataatsimiititaliamit isigineqanngilaq.

Inatsisartut siulittaasuata Naalackersuisullu siulittaasuata akeqanngitsumik ineqartitaanerisa atorunnaarsinneqarnissaa ataatsimiititaliamit pisariaqartutut isigineqanngilaq, tassa akeqanngitsumik ineqartitaaneq akileraartarnermut oqartussaasunut pissusissaatut nalunaarutigineqartartoq ataatsimiititaliap naatsorsuutigimmagu.
(Allannguutissatut siunnersuut nr. 212)

Konto pingarneq 10.19.07 ICC

Ineqarnermut akiliutinut ICC-p aningaasartuuteqarnerata taarsiuteqarfigineqarnissaa siunertaralugu aningaasaliissutit 2010-mi 557.000 kr.-inik amerlineqarnissaa Naalackersuisut siunnersuutigaat. 2011 aallarnerfigalugu aningaasartuut taanna ICC-p nammineq akilertassavaa. Allannguutissatut siunnersuut una sammisaq 18-ip ataani allannguutissatut siunnersuummut atatillugu isigineqassaaq.
(Allannguutissatut siunnersuut nr. 213)

¹ Ineqarnermut akiliutit ullutsinnut naleqquttuunissaat inissianilu allani ineqarnermut akiliutit naatsorsortarnerannut maleruagassanut sanilliullugu naammaginaruunissaat qulakkeerniarlugu Namminersorlutik Oqartussat sulisorisanut inissiaataanni najugarineqartussaataasuni ineqarnermut akiliutit maleruagassiornissaannik pisariaqartitsisoqarnerasoq aamma isumaliutigineqarsinnaalluarpoq.

Konto pingaarneq 34.11.03 Dronning Ingridip Napparsimmavissua

Inooriaatsip nassatarisaanik nappaatit amerliartornerat tunngavigalugu aningaasaliissutit 2010-mi 7.400.000 kr.-inik aammalu ukiuni missingersuusiorfiusuni tamani 7,4 mio. kr.-inik amerlineqarnissaat Naalakkersuisut siunnersuutigaat. Aningaasaliissutinik taakkuninnga qanimut malittarinninnissani ataatsimiititaliap kissaatigaa. Taamaalillunilu inooriaatsip nassatarisaanik nappaatit amerliartuinnarnissaat naatsorsuutigineqarsinnaatillugu aningaasaliissutit ukiuni missingersuusiorfiusuni tamani assigiimmik amerlisinneqarnissaat Naalakkersuisut siunnersuutigimmassuk ataatsimiititaliamit tupigusuutigineqarpoq.

(Allannguutissatut siunnersuut nr. 219)

Konto pingaarneq 51.02.03 Puisit amiinik tunisinermi akinut tapiissutit

Ingerlatseqatigiiffimmut Great Greenland A/S-imut tapiissuteqarnissaq siunertaralugu aningaasaliissutit 2010-mi 12.000.000 kr.-inik amerlineqarnissaat Naalakkersuisut siunnersuutigaat.

Suliffeqarfik akiliisinnaajunnaassanngippat Great Greenlandimut aningaasaliissuteqarnissaq pisariaqassasoq Aningaasaqarnermut Ataatsimiititaliaq naliliivoq. Kontoli pingaarneq una aqcutigalugu taamatut aningaasaliissuteqarnissaq naapertuutinngilluinnartutut ataatsimiititaliamit isigineqarpoq. Taamaalilluni isumaqartitsisoqalissaaq piniartut amerlanerusunik tapiiffigineqartoq. Kukkuneq taanna aaqqinniarlugu allannguutissatut siunnersuummik ataatsimiititaliaq nammineq saqqummiussivoq. Ilassutitut isumaliutissiissummi immikkoortoq 3.11 innersuussutigineqarpoq.

(Allannguutissatut siunnersuut nr. 222)

Konto pingaarneq 87.72.07 Sulisorisanut inissiat

Pisortamut inissiamik ullutsinnut naleqquttumik pisinissaq siunertaralugu aningaasaliissutit 2010-mi 5.000.000 kr.-inik amerlineqarnissaat Naalakkersuisut siunnersuutigaat. Inissaq taanna Naalakkersuisut siulittaasuannut naatsorsuusaasoq Aningaasaqarnermut Ataatsimiititaliamit naatsorsuutigineqarpoq, tassa atorffimmut atatillugu inissiatut atorniarneqartoq maanna annertuumik iluarsanneqarmat.

Nuummili pisortanut inissianik ullutsinnut naleqqukkunnaarsimasunik tunisinikkut aningaasartuut taanna aningaasalersorniarneqartoq missingersuutinut ilanngussami allassimavoq. Suliassaqarfimmi tamatumani tunineqartussatut iluanaarutissatulluunniit naatsorsuutigisat malillugit Naalakkersuisut missingersuusiornissaat Aningaasaqarnermut Ataatsimiititaliap kissaatiginngilaa, tamannalu aaqqinniarlugu allannguutissatut siunnersuummik nammineq saqqummiussilluni. Ilassutitut isumaliutissiissummi immikkoortoq 3.11 innersuussutigineqarpoq.

(Allannguutissatut siunnersuut nr. 224)

3.2 Sammisag 11 – Pingajussaaneerinninnissamut teknikkikkut allannguutit

Qulequttami tassani allannguutissatut siunnersuutinik qulingiliuanik Naalakkersuisut saqqummiussippat. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugit IST-mut sunniuteqassanngillat.

Piffissami kingullermi ineriartorneq tunngavigalugu kontoni pingaarnerni arlalinni aningaasaliissutinut tunngavigineqartunik erseqqissaanernut nutarterinernullu allannguutissatut siunnersuutit taakku tunngapput.

Sammissaq 11-p ataani allannguutissatut siunnersuutit nr. 225, 227, 229-imit 233-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 11-p ataani allannguutissatut siunnersuutit nr. 226 aamma 228 itigartinneqassasut Aningaasaqarnermut Ataatsimiititaliami ikinnerussuteqartut Siumup Atassutillu ilaasortaataasa **inassutigaat**.

Sammissaq 11-p ataani allannguutissatut siunnersuutit nr. 226 aamma 228 **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataasa **inassutigaat**.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigiumaneqarput.

Konto pingarneq 20.05.20 Kommuninut ataatsimoortumik tapiissutit

Kommuninut ataatsimoortumik tapiissutissatut siunnersuutigineqareersunut Naalakkersuisut allannguutissatut siunnersuuteqanngillat. Missingersuutinulli ilanngussap oqaasertaasa arlalinnik allannguuteqartinneqarnissaa siunnersuutigineqarpoq.

Nunataa karsiata aningaasaqarnikkut inissisimanagera eqqarsaatigalugu kommunit, kommuninut ataatsimoortumik tapiissutit killilimmik ikilinerisigut Namminersorlutik Oqartussat aningaasaqarnerannut tapeeqataasariaqartut Aningaasaqarnermut Ataatsimiititaliami amerlanerussuteqartut, Inuiat Ataqtigiiit aamma Demokraatit ilaasortaataat isumaqarput.

Meeqqalli atuarfianni atuartunut angajullernut tapiissutit 1. august 2010 aallarnerfigalugu atorunnaarsinneqarnissaat missingersuutinut suli ilaatinneqartoq ataatsimiititaliami amerlanerussuteqartut maluginiarpaat. Allanguineq taanna ukiumik ataatsimik kinguartinneqarsinnaasoq amerlanerussuteqartunit ilimagineqarpoq, taamaattumillu 2010-p ingerlanerani aningaasaliissutit uku amerlinerisigut kommuninut taarsiissuteqarnissaq *pisariaqalersinnaalluni*.

Aaqqissuussaannermik iluarsaaqqinnerup eqqunneqarnerata kingorna kommunit sipaarnissamut peqquneqarnissaannut siusippallaartoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataat isumaqarput. Akerlianik aaqqissuusseqqinnerup kingorna ukiuni siullerni aningaasartuuteqarnerunissaq naatsorsuutigineqartariaqarpoq, tamannalu ilaatigut Bornholmimi kommuninik iluarsaaqqinnermit misilittakkanut naapertuuppoq. Akerlianik kommuninik iluarsaaqqinneq ingerlallualeriarpat kommunini allaffissornikkut sipaaruteqarnissaq taparserneqarsinnaavoq. Tamatuma saniatigut sipaaruteqarnerup kingunerisassai pillugit ilisimasaqarnerunissaq pisariaqartinneqarpoq, tassa minnerunngitsumik kommunit akileraarutitigut isertitaat pillugit KANUKOKA-mit Akileraartarnermullu Aqutsisoqarfimmit assortuuttumik oqariartuutit eqqarsaatigalugit suliaq qularnaatsumik isummerfigineqarsinnaanngimmat.

Ilasutitut isumaliutissiissummi immikkoortoq 2.1 aamma innersuussutigineqarpoq.
(Allannguutissatut siunnersuut nr. 226)

Konto pingarneq 24.11.12 Raajanut akitsuutit

Raajanut akitsuutip qaffanneqarnissaa pillugu Inatsisartut aalajangigaata ilanngunneqarnissaa siunertaralugu missingersuutinut ilanngussap oqaasertaasa arlalinnik allannguuteqartinneqarnissaa Naalakkersuisunit siunnersuutigineqarpoq (UKA 09/123).

UKA 09/123-imik Inatsisartut suliarinninneranni amerlanerussuteqartut oqaaserisaat innersuussutigalugit Aningaasaqarnermut Ataatsimiititaliami amerlanerussuteqartut, Inuiat Ataqtigiiit aamma Demokraatit ilaasortaataasa allannguutissatut siunnersuut taanna akueraat.

UKA 09/123-imik Inatsisartut suliarinninneranni ikinnerussuteqartut oqaaserisaat innersuussutigalugit Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa allannguutissatut siunnersuut taanna akuerisinnaanngilaat.
(Allannguutissatut siunnersuut nr. 228)

3.3 Sammisag 12 – Pingajussaaneerinninnissamut sanaartornermi nussuineq

Qulequttami tassani allannguutissatut siunnersuutinik pingasunik Naalakkersuisut saqqummiussipput. Allannguutissatut siunnersuutit taakku IST-mut sunniuteqassanngillat.

Pinngortitaleriffiup angallatissaata nutaap Aningaasaqarnernermut Ataatsimiititaliamit akuerineqarnerata aningaasanut inatsimmut ilanngunneqarnissaa siunertaralugu allannguutissatut siunnersuutit taakku saqqummiunneqarput.

Sammisaq 12-ip ataani allannguutissatut siunnersuutit nr. 234-imit 236-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.4 Sammisag 13 – Akitsuutit atuinermilu akiliutit

Qulequttami tassani allannguutissatut siunnersuutinik marlunnik Naalakkersuisut saqqummiussipput. Allannguutissatut siunnersuutit taakku IST-p ataatsimut inerneranut 2010-mi 2.800.000 kr.-inik ukiunilu missingersuusiorfusuni tamani 2,8 mio. kr.-inik pitsanngoriaataapput.

Sammisaq 13-ip ataani allannguutissatut siunnersuut nr. 237 **akuerineqassasoq** Aningaasaqarnermut Ataatsimiititaliamit **inassutigineqarpoq**.

Sammisaq 13-ip ataani allannguutissatut siunnersuut nr. 238 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataaasa **inassutigaat**.

Sammisaq 13-ip ataani allannguutissatut siunnersuut nr. 238 **akunerineqassasoq** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataaasa **inassutigaat**.

Konto pingaarneq 51.01.05 Kalaallit Nunaanni Aalisarsinnaanermut Akuersissutinik Nakkutilliisoqarfik

Aningaasaliissutit 2010-mi 700.000 kr.-inik ukiunilu missingersuusiorfusuni tamani 0,7 mio. kr.-inik amerlineqarnissaat Naalakkersuisut siunnersuutigaat. Tamanna UKA 09/95-imik Inatsisartut akuersissutiginninnissaannik naatsorsuutiginninneq tunngavigalugu pivoq. Inatsisissatut siunnersuut taanna aqutugalugu atuisut akiliuteqartinneqarnissaannut aalisarsinnaanermut akuersissutinik nakkutilliisoqarfik tunngavissinneqarpoq.

UKA 09/95-imik Inatsisartut suliarinninneranni amerlanerussuteqartut oqaaserisaat innersuussutigalugit Aningaasaqarnermut Ataatsimiititaliami amerlanerussuteqartut, Inuiat Ataqtigiit aamma Demokratit ilaasortaataaasa allannguutissatut siunnersuut taanna akueraat.

UKA 09/95-imik Inatsisartut suliarinninneranni ikinnerussuteqartut oqaaserisaat innersuussutigalugit Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataaasa allannguutissatut siunnersuut taanna akuerisinnaanngilaat. (Allannguutissatut siunnersuut nr. 238)

3.5 Sammisag 14 – Pingajussaaneerinninnissamut missingersuutitut sunniuteqanngitsumik allannguutit

Qulequttami tassani allannguutissatut siunnersuutit sisamanik Naalackersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugit IST-mut sunniuteqassanngillat.

Allannguutissatut siunnersuutit aqutigalugit Pinngortitaq pillugu Naammagittaalliuuteqartarfiup Siunnersuisoqatigiinnut Ataatsimiititalianullu Aqutsisoqarfimmut nuunneqarnera tunngavigalugu aningaasanik nuussisoqarpoq. Tamatuma saniatigut Nukissiorfinnut ingerlatsinermut aningaasaliissutit erngup nukinganik misissueqqaarnermut ukiuni tamani 6,6 mio. kr.-inik nuussisoqassaaq.

Sammisag 14-ip ataani allannguutissatut siunnersuutit nr. 239-imit 242-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.6 Sammisag 15 – KIIN-imi allaffissornikkut utaqqiisaasumik ineqartitsinermut sipaarutit

Qulequttami tassani allannguutissatut siunnersuutit 15-inik Naalackersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugit IST-mut sunniuteqassanngillat.

Suliasaqarfimmi 40-mi utaqqiisaasumik ineqartitsinermut tunngasut Namminersorlutillu Oqartussani nioqutissanik pisiniartarnerup qitiusumit aqunneqalernerata kingunerisaanik sipaarutissat allannguutissatut siunnersuutit aqutigalugit piviusunngortinneqarnerat naammassineqarpoq.

Allannguutissatut siunnersuutit taakku allannguutissatut siunnersuutitut sammisag 9-mi utaqqiisaasumik inissiaqarnerup qitiusumik aqunneqarneranik taaguuserlugit aappassaaneerinermit saqqummiunneqartunut atatillugit isigineqassapput. Sammisag 9-mut ilaavoq kontomut pingaarnermut 40.01.99-imut, Missingersuutit iluarsinermut tunngasumut, allannguutissatut siunnersuut nr. 182. Aappassaaneerinermit kontomi pingaarnermit tassani 2010-mi 3.905.000 kr.-inik aammalu ukiuni missingersuusiorfiusuni tamani 3,8 mio. kr.-inik immikkoortitsisoqarpoq. Sammisag 15-ip ataani allannguutissatut siunnersuutit aqutigalugit kontomi pingaarnermit 40.01.99-imi, Missingersuutit iluarsinermut tunngasumi, aningaasaliissutit ukiuni tamani 0-inngortillugit ikilineqarput, tassa suliasat siuliani taaneqartut qitiusumut nuunneqarnerisa kingunerisaanik sipaarutissanik piviusunngortitsineq Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmit naammassineqarpat.

Akerlianik sammisag 15-ip ataani allannguutissatut siunnersuutit sammisag 8-p ataani allaffissornikkut sipaaruteqarnermik taaguuserlugit aappassaaneerinermit allannguutissatut siunnersuutitut saqqummiunneqartunut attuumassuteqanngillat. Naluneqanngitsut sammisag tamatuma ataani (sammisag 8) sipaarutissatut pilersaarutigineqartunik Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmit piviusunngortitsisimannginnera aappassaaneerinermit isumaliutissiisummi Aningaasaqarnermut Ataatsimiititaliamit naammagineqanngilaq. Apeqqut taanna ilassutitut isumaliutissiisummi matumani piffimmi allami ataatsimiititaliamit isummerfigineqarpoq.

Sammissaq matumani pineqartoq KIIIN-imi allaffissornikkut utaqqiisaasumik ineqartitsinermit sipaarutit-tut taagorneqarmat eqqunngitsumik paasissutissiineruvoq. Sammissaq eqqortumik ima taaguuserneqarsimasariaqaraluarpoq ”*KIIIN-ip utaqqiisaasumik ineqartitsinerup pisiortornerullu tungaatigut sipaaruteqarnissaminik naammassinninnera*”.

Sammissap matuma ataani allannguutissatut siunnersuutit nalinginnaasumik atuartartunit paasineqarsinnaasunngorlugit suliarineqarsimanngitsut Aningaasaqarnermut Ataatsimiititaliamit ataatsimut isigalugu oqaatigineqassaaq. Missingersuutitut ilanngussat allanik ikorfartorteqarani atuarneqarsinnaasunngorlugit sapinngisamik suliarineqartarnissaat ukiuni arlalinni ataatsimiititaliamit akuttunngitsumik eqqaasitsissutigineqartaraluarpoq.

Sammissaq 15-ip ataani allannguutissatut siunnersuutit nr. 243-mit 257-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.7 Sammissaq 16 – Ingerlatsinermi ileqqaarutit

Qulequttami tassani allannguutissatut siunnersuutit sisamanik Naalakkersuisut saqqummiussipput. Allannguutissatut siunnersuutit taakku IST-p ataatsimut inerneranut 2010-mi 28.237.000 kr.-inik ukiunilu missingersuusiorfiusuni tamani 20,8 mio. kr.-inik pitsanngoriaataapput.

Sammissaq 16-ip ataani allannguutissatut siunnersuutit nr. 258 aamma 260-imit 261-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 16-ip ataani allannguutissatut siunnersuutit nr. 259 **itigartinneqassasoq** Aningaasaqarnermut Ataatsimiititaliamit **inassutigineqarpoq**.

Konto pingaarneq 20.05.31 Kommunini aningaasartuutaanerusussanut immikkoortitat

Eqqagassalerinermut pilersaarutip kinguartinneqarnerata kingunerisaanik aningaasaliissutit 2010-mi 8.310.000 kr.-inik ikilineqassasut Naalakkersuisut siunnersuutigaat.

Eqqagassalerinermut pilersaarutip kinguartinneqarnera Aningaasaqarnermut Ataatsimiititaliamit ugguarineqarpoq. Ilassutitut isumaliutissiisummi immikkoortoq 2.6-imi siunertamut kontomut 77.05-imut, Avatangiisinut Pinngortitamullu tunngasumi, oqaaseqaatit innersuussutigineqarput. (Allannguutissatut siunnersuut nr. 258)

Konto pingaarneq 20.11.50 Ingerlatsinermit sillimmatit

Aningaasaliissutit 2010-mi 20.000.000 kr.-inik ukiunilu missingersuusiorfiusuni tamani 20,0 mio. kr.-inik ikilineqarnissaat Naalakkersuisut siunnersuutigaat. Tamatum kingorna ingerlatsinermit sillimmaqarunnaassaaq. Tamanna missingersuutit malinninnerulernermik kinguneqassasoq Naalakkersuisut naatsorsuutigaat.

Missingersuutiniq malinneqartarnerannik pitsanngortitsinissaq siunertaralugu aningaasanut inatsisini sillimmatitut aningaasaliussat killeqartariaqartut Aningaasaqarnermut Ataatsimiititaliamit ukiuni arlalinni kaammattuutigineqartarsimavoq. Ingerlatsinermulli sillimmatit nunguillugit peerneqarpata tamanna killormut sunnuteqarsinnaasoq ataatsimiititaliamit aarleqqutigineqarpoq. Taamaattumik allannguutissatut siunnersuut matumani pineqartoq itigartinneqassasoq ataatsimiititaliap inassutigaa. Ingerlatsinermut sillimmatit annikinnerusumik ikilisinneqarnissaannut allannguutissatut siunnersuummik ataatsimiititaliaq tamatumunnga taarsiullugu nammineq saqqummiussivoq. Isumaliutissiissummi immikkoortoq 3.11 innersuussutigineqarpoq. (Allannguutissatut siunnersuut nr. 259)

3.8 Sammisag 17 – Sanaartornermi ileqqaarutit

Qulequuttami tassani allannguutissatut siunnersuutiniq arfineq pingasunik Naalakkersuisut saqqummiussipput. Allannguutissatut siunnersuutit taakku IST-p ataatsimut inerneranut 2010-mi 76.000.000 kr.-inik pitsanngoriaataapput aammalu 2011-imi 30,7 mio. kr.-inik kiisalu 2012-imi 2013-imilu 5 mio. kr.-inik IST-p inerneranut *ajorseriaataassapput*.

Allannguutissatut siunnersuutit taakku aqputigalugit sanaartornermut atugassat agguanneqanngitsut ikilineqarput. Tamatuma saniatigut sanaartornermut aningaasaliissutit ilaat kinguartinneqarput, kiisalu suliassaqaqfimmi nutarterinissap kingunerisaanik ineqarnermut tapiissuteqartarnermut aningaasaliussat ikilineqarput.

Sammisag 17-ip taani allannguutissatut siunnersuutit nr. 262-imit 269-imut itigartinneqassasut Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa **inassutigaa**.

Sammisag 17-ip taani allannguutissatut siunnersuutit nr. 262-imit 269-imut **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataasa **inassutigaa**.

Sammisap matuma ataani sipaarutissat arlallit allannguutissatut siunnersuutit immikkut akuerineqarsinnaagaluartut ataatsimiititaliami ikinnerussuteqartut immikkut oqaatigiumavaat. Sammisalli matuma ataani allannguutissatut siunnersuutit taakku ataatsimoortinneqarnerisigut Namminersorlutik Oqartussat sanaartornikkut ingerlataat annertuallaamik ikilisarneqartutut isigineqarput, tamannalu nuna tamakkerlugu sanaartornermut ingerlataqartunut ajoqusiisinnaavoq. Tamatuma saniatigut nunaqaqfinni isorliunerusunilu sanaartornissamut aningaasat maanna piffissamut 2011-2013-imut tamarmut atuuttussanngortinneqarnerat nunaqaqfinit isorliunerusunullu naapertuutinngitsutut isigineqarpoq. Kiisalu sammisap matuma ataani allannguutissatut siunnersuutit missingersuutiniq kusasaanertut isikkoqarput, tassa aningaasartuutit ukiunut missingersuusiorfiusunut nuutinnerisigut 2010-mi IST-p inerneranik pitsanngorsaanissamik allannguutissatut siunnersuutit arlallit siunertaqarnerat ersarimmat. Aningaasaqarnermut Ataatsimiititaliap naaperiarnissaa ataatsimiititaliami ikinnerussuteqartunit siunnersuutigineqaralarpoq, taamaalilluni sammisap matumani pineqartup ataani allannguutissatut siunnersuutit aqputigalugit sipaarutissat 2010-mi assersuutigalugu 56 mio. kr.-inut killilerneqarlutik. Amerlanerussuteqartulli naapeqatigiinnissaq ajoraluartumik kissaatiginnigilaat, tamannalu ikinnerussuteqartunit assut ajuusaarutigineqarpoq.

Pivusorsiornerusumik missingersuusiortarnissamik Aningaasaqarnermut Ataatsimiititaliap kaammattuutaanut sammisap matumani pineqartup ataani allannguutissatut siunnersuutit naapertuulluurtut ataatsimiititaliami amerlanerussuteqartut immikkut oqaatigiumavaat, tassami aningaasat aatsaat atorneqartussanngoraangata aningaasanut inatsimmi immikkortinneqartariaqarmata. Taamaattumik sanaartornermut aningaasaliissutit ilaasa kinguartinneqarnerat amerlanerussuteqartut ajornartorsiutissaqartutut isiginngilaat. Tamatuma saniatigut nunatsinni sumiiffinni arlalinni sanaartornermik annertuallaamik ingerlatsinerup kingunerisaanik sanaartornermi akit qaffakkiartornerat takussutissaqartoq amerlanerussuteqartunit tikkuarneqassaaq, tamannalu pissutigalugu sanaartornermut atugassiissutit mianersortumik ikiliskkiartuaarneqartariaqarsorinarlutik. Tamatuma saniatigut aningaasanut inatsimmi sanaartugassanut aningaasaliissutit avataatigut Illuut A/S aqputigalugu sanaartukkat aallartinneqartussat amerlinissaat naatsorsuutigineqarsinnaavoq, taamaattumillu sanaartornermik ingerlataqartut siunissaat aarleqqutigissallugu tunngavissaqanngitsoq amerlanerussuteqartut isumaqarput.

3.9 Sammisag 18 – Pingajussaaneerinninnissamut isertitaqarnerunissamik inatsisitigullu aningaasartuutinit pisussaaffigisanit naatsorsuutit

Qulequttami tassani allannguutissatut siunnersuutinik sisamanik Naalakkersuisut saqqummiussipput. Allannguutissatut siunnersuutit taakku IST-p ataatsimut inerneranut 2010-mi 11.443.000 kr.-inik ajorseriaataassapput aammalu ukiuni missingersuusiorfiusuni tamani IST-p inerneranut 48,6 mio. kr.-inik pitsanngoriaataassallutik.

Inuit Service Companymit (ISCO) pissarsiassanit akiliutit amerlinerannut (Nr. 270), ICC-mit ineqarnermut akiliutinit isertitanut (Nr. 271), salisakkanut isumalluutinik pissarsianik akitsuutip atorunnaarsinneqarneranut (Nr. 272) kiisalu akileraarutinit akitsuutinillu 2011-imit isertitassatut naatsorsuutigineqartut amerlinissaannut (Nr. 273) suliaasaqarfimmi matumani allannguutissatut siunnersuutit tunngasuupput.

Kontomut pingaarnermut 24.13.50-imut, Akileraartarnermi akitsuusiisarnermilu isertitaqarnerulernissamut sillimmatinut tunngasumut, allannguutissatut siunnersuummut nr. 273-imut naqqiummik saqqummiussisoqarmat maluginiaqquneqarpoq. Naqqiut taanna ilanngussaq N-ip ataanut ilanngunneqarpoq.

Allannguutissatut siunnersuutit nr. 270-mit 272-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammisag 18-ip ataani allannguutissatut siunnersuut nr. 273 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa **inassutigaat**.

Sammisag 18-ip ataani allannguutissatut siunnersuut nr. 273 **akuerineqassasoq** Aningaasaqarnermut Ataatsimiititaliami amerlanerussuteqartut, Inuit Ataqatigiit Demokratitillu ilaasortaataasa **inassutigaat**.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigiumaneqarput:

Konto pingarneq 10.13.10 Iluanaarutit, aktianik piginneqatigiiffinniit piginneqataassutit tunisinerillu

Isertitatut aningaasaliissutit 2010-mi 10.000.000-inik amerlineqarnissaat Naalakkersuisut siunnersuutigaat. Ukiuni missingersuusiorfusuni isertitat amerlinissaat soq naatsorsuutigineqannginnersoq pillugu pingajussaaneerinissamut akissuteqaammi naatsumik nassuiaatigeqqullugu Naalakkersuisut Aningaasaqarnermut Ataatsimiititaliamit **qinnuigineqarput**. (Allannguutissatut siunnersuut nr. 270)

Konto pingarneq 24.13.50 Akileraatarnermi akitsuusiisarnermilu isertitaqarnerulernissamut sillimmatit

Aningaasaliissutit ukiuni missingersuusiorfusuni tamani 60 mio. kr.-inik amerlineqarnissaat Naalakkersuisut siunnersuutigaat. Akileraatarnermut Atugarissaarnissamullu Isumalioqatigiissitap kaammattuutissaatut naatsorsuutigineqartut kingunerisaannik tamanna pivoq. Allannguutissatut siunnersuut una akuerineqassapat kontomi pingaarnermi isertitassatut missingikkat 2011-imit katillugit 105 mio. kr.-inngussapput. Tamanna tunngavigalugu isertitassat amerlinissaannik taama naatsorsuutiginninnermut tunngaviusup erseqqinnerusumik paasisaqarfiginissaa siunertaralugu Aningaasaqarnermut Naalakkersuisoq isumasioqatigiilluni ataatsimiinnissamut Aningaasaqarnermut Ataatsimiititaliamit aggersarneqarpoq.

Ulloq 23. november 2009-mi ullaakkut ualikkullu isumasioqatigiilluni marloriarluni ataatsimiinnerni Naalakkersuisunut ilaasortap paasisutissiissutigaa akileraarutinit akitsuutinillu isertitassatut naatsorsuutigisat suliniummik ataatsimik arlalinnilluunniit matuma kinguliani allassimasunik atuinissamut periarfissamik tunngaveqartut:

Nuannaarniutigalugit biilinu angallatinullu akitsuutit:	15 mio. kr.
Cigaritsinik imigassanillu aalakoornartulinnik akitsuuteqanngitsunik eqqussuinerup unitsinneqarnera:	25 mio. kr.
Cigaritsit akiinik qaffasinnerpaaffiliineq:	25 mio. kr.
Akitsuutit, soorlu ikummatissanut akitsuut (liiterimut 35 øre):	60 mio. kr.
Akileraarutininik 1 %-imik qaffaaneq	65 mio. kr.
Sipaarutit	60 mio. kr.
Katillugit	250 mio. kr.

Tamanna tunngavigalugu akileraarutininik akitsuutinillu katillugit 105 mio. kr.-inik nassaarniarnissaq Naalakkersuisunut ilaasortamit piviusorsiorlutut isigineqarpoq, soorlu tamanna allannguutissatut siunnersuutikkut nr. 273-ikkut siunertarinqartoq.

Allannguutissatut siunnersuut nr. 273 akileraatarnermut atugarissaarnissamullu isumalioqatigiissitamut pituttuisutut isigineqanngitsoq isumasioqatigiilluni ataatsimiinnermi kingullermi Naalakkersuisunut ilaasortamit erseqqissaatigineqarpoq. Taamaalillunilu tassani pineqartut tassatuaapput akitsuutitigut iliuusissat Nunatta Karsiata isertitassaanik pisariaqartinneqartunik qulakkeerutaasussanik akileraatarnermut atugarissaarnissamullu isumalioqatigiissitaq kaammattuutinik saqqummiussinngippat Naalakkersuisunit atorineqarsinnaasut.

Piffissap taamaalinerani, tassalu akileraartarnermut atugarissarnermullu isumalioqatigiissitaq sulilunniit siullermik ataatsimiinngitsoq isertitassatut missingikkat taama annertutigisumik qaffannissaat illersorneqarsinnaanngitsoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataat isumaqarput. Taamaaliornikkut akileraarutitik qaffaaneg annertuumillunniit akitsuusiineq aningaasanut inatsimmuq ilanngullugit missingersuutigineqartut ikinnerussuteqartunit oqaatigineqassaaq, tamannalu Inatsisartunik naapertuutinnngilluinnartumik pituttuineruvoq. Akileraarutitigut akitsuutitigullu nammatassat annertusitiinnarnagit Nunatta Karsiata aningaasaqarneranik oqimaaqatigiissaarinissamut periarfissanik allanik Naalakkersuisut nassaarniartariaqarput. Allannguutissatut siunnersuut taanna ikinnerussuteqartunit akuerineqarsinnaanngilaq.

Minnerunngitsumik avatangiisinut siuarsaataasunik ukiuni aggersuni akitsuusersuisoqarniarloq allannguutissatut siunnersuutikkut matumani pineqartukkuq Naalakkersuisunit nalunaarutigineqartoq Aningaasaqarnermut Ataatsimiititaliami amerlanerussuteqartut, Inuit Ataqatigiit Demokraatillu ilaasortaataasa maluginiarpaat. Tamanna ukiuni aggersuni silap pissusaanut tunngasumik anguniagassatut nalunaarutigineqartunut naapertuuppoq. Tamatuma saniatigut Akileraartarnermut Atugarissaarnissamullu Isumalioqatigiissitamut suliakkiunneqartut naapertorlugit isertitassatut sillimmatit piviusunngortinneqarnerat inuiaqatigiinni oqimaaqatigiissaakkamik pissasoq amerlanerussuteqartut naatsorsuutigaat, taamaalilluni avatangiisit mianerineqarlutillu namminersulernerup eqqunneqarnerata kingorna piffissami siullermi Nunatta Karsianut nammatassiissutaasut qaangerneqarnissaannik pisariaqartitsineq isiginiarneqassalluni.

(Allannguutissatut siunnersuut nr. 273)

3.10 Sammisag 22 – AUL-imut tapiissutit taakkulu aningaasalersornerat

Qulequttami tassani allannguutissatut siunnersuutitik sisamanik Naalakkersuisut saqqummiussippot. Allannguutissatut siunnersuutit taakku IST-p 2010-mi inerneranut sunniuteqassanngillat. Ukiuni missingersuusiorfiusuni pingasuni tamani IST-p inenera 0,3 mio. kr.-inik pitsanngoriaateqartissavaat.

Suliassaqarfimmi matumani allannguutissatut siunnersuutini ilaatigut pineqarpoq Arctic Umiaq Linep sinerissami ilaasunik angallassinermik ingerlatsineranut immikkut ittumik tapiissuteqarnissaq (Nr. 287), tamannalu kommunimut tunngasuni aningaasartuuteqarnerunissamut sillimmatit ilanngaaviginerisigut (Nr. 284), atuarfimmi nerisaqartitsinermut 2010-mi aningaasaliissutit ikilinerisigut (Nr. 285) aamma Radioqarnermut Tv-qarnermullu ataatsimiititaliap 2010-p qiteqqunneranit atorunnaarsinneratigut (Nr. 286) aningaasalersorneqassaaq.

Allannguutissatut siunnersuutit nr. 285 aamma 286 Kultureqarnermut Ilinniartitaanermullu Ataatsimiititaliap inassuteqarneratigut Naalakkersuisunit saqqummiunneqarput. Tamanna taparserneqartoq Aningaasaqarnermut Ataatsimiititaliamit oqaatigineqarpoq.

Sammisag 22-ip ataani allannguutissatut siunnersuutit nr. 285-imit 287-imut akuerineqassatut Aningaasaqarnermut Ataatsimiititaliap **inassutigaa**.

Sammisag 22-ip ataani allannguutissatut siunnersuut nr. 284 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa **inassutigaa**.

Sammissaq 22-ip ataani allannguutissatut siunnersuut nr. 284 akuerineqassasoq Aningaasaqarnermut Ataatsimiititaliami amerlanerussuteqartut Inuit Ataqatigiit Demokratillu ilaasortaataasa **inassutigaa**.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigiumaneqarput:

Konto pingaarneq 20.05.31 Kommunini aningaasartuutaanerusussanut immikkoortit

Arctic Umiaq Linep sinerissami ilaasunik angallassineranut tapiissutitut aningaasaliissutitut qaffaanerup ilaata aningaasalersorneqarnissaa siunertaralugu aningaasaliissutit 2010-mi 1.350.000 kr.-inik ikilineqarnissaat Naalakkersuisut siunnersuutigaat, tak. allannguutissatut siunnersuut nr. 287.

Kommuninut ataatsimoortumik tapiissutit pillugit ilassutitut isumaliutissiissummi ikinnerussuteqartut oqaaserisaat innersuussutigalugit allannguutissatut siunnersuut una Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa akuerisinnaangilaat, tak. immikkoortoq 2.1.

Sinerissami ilaasunik angallassinernerup ingerlaannarnissaanut aningaasaliinissap pisariaqarnera innersuussutigalugu allannguutissatut siunnersuut una Aningaasaqarnermut Ataatsimiititaliami amerlanerussuteqartut, Inuit Ataqatigiit Demokratillu ilaasortaataasa akuerisinnaavaat. (Allannguutissatut siunnersuut nr. 284)

3.11 Sammissaq 23 – Aningaasaqarnermut Ataatsimiititaliap allannguutissatut siunnersuutai
Aningaasaliissutitut allannguutissatut siunnersuutitut tallimanik Aningaasaqarnermut Ataatsimiititaliap saqqummiussivoq, tak. takussutissiaq matuma kingulianiittoq.

Sammissaq 23: Aningaasaqarnermut Ataatsimiititaliap allannguutissatut siunnersuutai				2010	2011	2012	2013
Nr.	Konto						
288	10.13.11	T	Iluanaarutit, aktianik piginneqatigiiffinniit piginneqataassutit tunisinerillu	12.000.000	0,0	0,0	0,0
289	20.11.50	T	Ingerlatsinerumt sillimmatit	-10.000.000	-10,0	-10,0	-10,0
290	40.01.99	D	Missingersuutitut iluarsuussutit	-2.000.000	-4,2	-4,2	-4,2
291	51.02.03	T	Puisit amiinik tunisinermit akinut tapiissutit	-12.000.000	0,0	0,0	0,0
292	87.72.07	A	Sulisorisanut inissiat	0	0,0	0,0	0,0
			IST-mut sunniut	-12.000.000	-14,2	-14,2	-14,2

Aningaasaqarnermut Ataatsimiititaliap aningaasaliissutitut allannguutissatut siunnersuutai ataatsimut isigalugu IST-ip inerneranut 2010-mi 12.000.000 kr.-inik aammalu ukiuni missingersuusiortifiusuni pingasuni tamani 14,2 mio. kr.-inik pitsanngoriaataassapput. Matumanili Naalakkersuisut allannguutissatut siunnersuutaannut Aningaasaqarnermut Ataatsimiititaliap inassuteqaataasa IST-mut sunniutaat ilanngunneqangillat.

Sammissaq 23-ip ataani allannguutissatut siunnersuutit nr. 288-imit 289-imut aamma 291-imit 292-imut **akunerineqarnissaat** Aningaasaqarnermut Ataatsimiititaliap isumaqatigiittup **inassutigaa**.

Allannguutissatut siunnersuut nr. 290 akuerineqassasoq Aningaasaqarnermut Ataatsimiititaliami amerlanerussuteqartut, Inuit Ataqtigiit Demokraatillu inassutigaa.

Allannguutissatut siunnersuut nr. 290 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu inassutigaa.

Missingersuutininut ilanngussat ilanngussaq M-ip ataanut ilanngunneqartut innersuussutigineqarput.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigiumaneqarput:

Konto pingaarneq 10.13.11 Aktiaateqarluni ingerlatseqatigiiffinnut aningaasanngorlugit aningaasartuutit

Great Greenland A/S-imut aningaasaliissuteqarnissaq siunertaralugu 2010-mi aningaasaliissutit 12.000.000 kr.-inik amerlineqassasut Aningaasaqarnermut Ataatsimiititaliap siunnersuutigaa. Allannguutissatut siunnersuut allannguutissatut siunnersuummut nr. 291-imut atasutut isigineqassaaq, tassani aningaasaliissutit taakku amerlaqataannik ikineqarlutik.
(Allannguutissatut siunnersuut nr. 288)

Konto pingaarneq 20.11.50 Ingerlatsinerneq sillimmatit

Aningaasaliissutit 2010-mi 10.000.000 kr.-inik ukiunilu missingersuusiorfiusuni pingasuni tamani 10,0 mio. kr.-inik ikilineqassasut Aningaasaqarnermut Ataatsimiititaliap siunnersuutigaa. Taamaaliluni ilanngaaseereerluni ingerlatsinerneq sillimmatit ukiumut 10 mio. kr.-iussapput. Naalackersuisut allannguutissatut siunnersuutaata nr. 259-ip itigartinneqarnissaanik Aningaasaqarnermut Ataatsimiititaliap inassuteqaataanut kingunerisaatut allannguutissatut siunnersuut una isigineqassaaq.
(Allannguutissatut siunnersuut nr. 289)

Konto pingaarneq 40.01.99 Missingersuutininut iluarsiiissutit

2010-mi -2.000.000 kr.-inik ukiunilu missingersuusiorfiusuni pingasuni tamani -4,2 mio. kr.-inik aningaasaliissuteqarnissaq Aningaasaqarnermut Ataatsimiititaliami amerlanerussuteqartut siunnersuutigaa.

Kultureqarnermut, Ilinniartitaanermeq, Ilisimatusarnermeq Ilageeqarnermullu Naalackersuisoqarfimmi aamma allaffissornikkut sipaaruteqarnissamik anguniakkat attatiinnarneqarnissaata pisariaqarnera ilassutitut isumaliutissiissutit matuma immikkoortuani 2.3-mi Aningaasaqarnermut Ataatsimiititaliamit nassuiaatigineqarpoq. Soorlu aamma tassani allassimasoq Naalackersuisunut ilaasortamik ataatsimeeqateqarluni isumasioqateqarnermi ataatsimiititaliamit paasineqarpoq suliassaqarfik 40-mi allaffissornikkut sipaaruteqartoqarsinnaasoq.

Inatsisartut aningaasanut inatsisissatut siunnersuummik pingajuussaaneerinissaat sioqqullugu sipaarutissat taakku ingerlatsinerneq kontoni pivusunngortinneqarsimanissaat ataatsimiititaliamit kissaatiginartinneqarsimagaluarpoq. Ajoraluartumik isumasioqatigiilluni ataatsimeeqatigiinnissamut apeqqutiminut akissutinik ersarissunik Aningaasaqarnermut Ataatsimiititaliaq tigusaqanngilaq, tak.

ilanngussaq E. Utaqqiisaasumik ineqartitsinerup pisiortornerullu Namminersorlutik Oqartussanit qitiusumik ingerlanneqalerneranut atatillugu (sammissaq 9) Naalackersuisoqarfiup nammineq sipaarutigisassami piviusunnngortinneqarnissaannut kinguaattoornini allaffissornikkut sipaarutissat (sammissaq 8) Naalackersuisoqarfimmut Naalackersuisut missingersuutigeqqaagaasa ingerlanneqarsimanginnerinut tunngavilersuutigaa.

Tamatuma saniatigut ilaatigut video telefonillu atorlugit ataatsimiittarnikkut imaluunniit immikkut ilisimasallit nunatsinnut aggersarnerisigut nunanut allanut angalanerit sipaarutiginnissaat kissaatiginartinneqanngitsoq isumasioqatigiilluni ataatsimiinnermi Naalackersuisoqarfiup Aningaasaqarnermut Ataatsimiititaliamut paasissutissiisutigaa. Tamatuma saniatigut 2008-mi 2009-milu kiisalu 2010-11-imi angalanernut taamaattunut qanoq annertutigisumik aningaasartuuteqartoqarsimanersoq qanorlu aningaasartuuteqartoqalersaarnersoq pillugu apeqqutiminut ataatsimiititaliaq akissutisinnigilaq. Taamaalilluni § 36 naapertorlugu apeqqummut akissut, Aningaasaqarnermut Ataatsimiititaliap apeqquteqarnermini tunngavittut nammineq allassimasaa, Naalackersuisunut ilaasortap kisiat innersuussutigaa.

Kommuninit sipaarutigineqartussat Namminersorlutik Oqartussanit piunasaqaatigineqartut annertoqataannik Namminersorlutik Oqartussat allaffissornikkut sipaaruteqarnissaannik anguniagaqarneq amerlanerussuteqartut allannguutissat siunnersuuteqarnerisigut attatiinnarneqarpoq. Tamatuma saniatigut Naalackersuisoqarfiit tamarmik assigiimmik atugassaqartinneqassapput, tassa allaffissornikkut sipaarutissat ilaannik suliassaqarfiit tamarmik nammatassinneqarmata.

Sipaarutissat missingersuutininut iluarsisutitut 2010-p ingerlanerani Naalackersuisoqarfimmit piviusunnngortinneqartussat immikkoortinneqarnissaat siunnersuutigineqarpoq. Tamatumani tunngavissaatinneqarpoq Aningaasaqarnermut Ataatsimiititaliap akuersissuteqarnissaa.

Sipaarutissat taakku pillugit anguniagaqarfiusumik Naalackersuisoqarfiup oqaloqatigineqarnissaa ataatsimiititaliamit anguniarneqassaaq.

Tamanna naapertuuttumik aaqqiinertut Aningaasaqarnermut Ataatsimiititaliamit amerlanerussuteqartut, Inuit Ataqatigiit Demokraatillu isigaa, tamannalu tunngavigalugu allannguutissatut siunnersuut akuerineqassasoq inassutigalugu.

Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup allaffissornikkut sipaaruteqarnissaannik anguniagaq Aningaasaqarnermut Ataatsimiititaliami ikinnerussuteqartut, Siumup Atassutillu isumaqatigaat. 2010-mili taamaallaat 2 mio. kr.-inik sipaaruteqarnissaq siunnersuutigineqarmat ikinnerussuteqartunit akuerineqarsinnaanngilaq. Tamatumani 2010-mi 3.889.000 kr.-inik sipaaruteqarnissamik anguniagaqarneq Aningaasaqarnermut Ataatsimiititaliap aalajangiusimasariaqaraluarpa. 2 mio. kr.-iinnaat sipaarutigineqarnissaannik amerlanerussuteqartut siunnersuuteqarnermikkut Aningaasaqarnermut Ataatsimiititaliamik salloqittaaniarneranut Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfik 2 mio. kr.-inik taamaalillutik akissarsisippaat. Tamanna tunngavigalugu allannguutissatut siunnersuut itigartinneqassasoq ikinnerussuteqartunit inassutigineqartariaqarpoq.
(Allannguutissatut siunnersuut nr. 290)

Konto pingaarneq 51.02.03 Puisit amiinik tunisinermi akinut tapiissutit

Great Greenland A/S-imut aningaasaliissuteqarnissaq siunertaralugu 2010-mi aningaasaliissutit 12.000.000 kr.-inik ikilineqassasut Aningaasaqarnermut Ataatsimiititaliap siunnersuutigaa. Allannguutissatut siunnersuut allannguutissatut siunnersuummut nr. 288-imut atasutut isigineqassaaq, tassani aningaasaliissutit taakku amerlaqataannik amerlineqarlutik.

Allannguutissatut siunnersuut piniarnermik inuussutissarsiuqartunut kinguneqarnerlussanngilaq, tassami matumani pineqartoq tassatuaammat aningaasaliissutinik kontomut pingaarnermut eqqortumut nuussineq.

(Allannguutissatut siunnersuut nr. 291)

Konto pingarneq 87.72.07 Sulisorisanut inissiat

Missingersuutinut ilanngussami oqaasertat eqqortumik takutitseqqullugit missingersuutinut sunniuteqanngitsumik iluarsineqarnissaat Aningaasaqarnermut Ataatsimiititaliap siunnersuutigaa. Missingersuutinut ilanngussaq innersuussutigineqarpoq.

(Allannguutissatut siunnersuut nr. 292)

4. Oqaasertaliussanut allannguutissatut siunnersuutit

4.1 Naalakkersuisut oqaasertaliussanut allannguutissatut siunnersuutaat

Oqaasertaliussat nutaat katillugit aqqanillit Naalakkersuisut siunnersuutigaat. Allannguutissatut siunnersuutit taakku 274-imit 283-imut kiisalu 294-imik normoqarput.

Allannguutissatut siunnersuutit nr. 274-imit 283-imut ilanngussaq A-p ataani ilanngunneqarput. Allannguutissatut siunnersuut nr. 294 ilanngussaq N-ip ataani ilanngunneqarpoq.

Allannguutissatut siunnersuutit nr. 274-imit 276-imut, 278-imit 280-imut, 282 aamma 294 **akuerineqassasut** Aningaasaqarnermut Ataatsimiititaliap **inassutigaa**.

Oqaasertaliussanut allannguutissatut siunnersuutit nr. 277, 281 aamma 283 itigartinneqassasut Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataaasa **inassutigaa**.

Oqaasertaliussanut allannguutissatut siunnersuutit nr. 277, 281 aamma 283 **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataaasa **inassutigaa**.

Tamatuma saniatigut allannguutissatut siunnersuutit matuma kingulianiittut ataatsimiititaliamit imikkut oqaaseqarfigumaneqarput:

Kantomut pingaarnermut 10.10.10-mut Naalakkersuisut

Oqaasertaliussaq aningaasarsiaqartitaanermut inatsimmut aalajangersakkat apeqqutaatinngit ineqarnermut akiliutit qaffassutaannik Naalakkersuisunut ilaasortanut toqqaannartumik akileeqqusinissamut periarfissiisoq Naalakkersuisut siunnersuutigaat. Allannguutissatut siunnersuummut tunuartinneqartumut nr. 212-imut allannguutissatut siunnersuut taanna taartaavoq.

(Allannguutissatut siunnersuut nr. 294)

Konto pingaarnermut 51.01.05-imut Kalaallit Nunaanni Aalisarsinnaanermut Akuersissutiniq Nakkutilliisoqarfik

Oqaasertaliussinissaq Naalakkersuisut siunnersuutigaat, tassani KANUAANA-p sullississutaanut atuisartut akiliutaat allassimallutik. Tamanna UKA 09/95-imik Inatsisartut akuersissutiginninnissaannik naatsorsuutiginninneq tunngavigalugu pivoq. Taamaalilluni allannguutissatut siunnersuut taanna sammisaq 13-ip ataani allannguutissatut siunnersuummut atatillugu isigineqassaaq.

UKA 09/95-imik Inatsisartut suliarinninneranni amerlanerussuteqartut oqaaserisaat innersuussutigalugit Aningaasaqarnermut Ataatsimiititaliami amerlanerussuteqartut, Inuiat Ataqaigiit aamma Demokraatit ilaasortaataaasa allannguutissatut siunnersuut taanna akueraat.

UKA 09/95-imik Inatsisartut suliarinninneranni ikinnerussuteqartut oqaaserisaat innersuussutigalugit Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataaasa allannguutissatut siunnersuut taanna akuerisinnaanngilaat.

Allannguutissatut siunnersuut 2010-mi aningaasanut inatsimmut inaarutaasumut ilanngunneqannginnerani kukkunerisiorneqassaaq.
(Allannguutissatut siunnersuut nr. 277)

Konto pingaarnermut 72.10.16-imut Inissianik attartortittakkanik ingerlatsineq. aningaasaatinit iluanaarutit

Nr. 4-p danskisuuani ”regnskabskredse”-mik allaqqasussaagaluartoq ”redskabskredse”-mik allaqqavoq. Tamatuma iluarsineqarnissaanut Aningaasaqarnermut Ataatsimiititaliap tapersiinera matumuuna oqaatigineqarpoq.

Aningaasanut inatsisissatut siunnersuutip aappassaaneerneqarnerani Aningaasaqarnermut Ataatsimiititaliap isumaliutissiissutaani immikkoortoq 2.10 aamma 3.8-mi Tuapannguani suliniut pillugu ikinnerussuteqartut oqaaserisaat innersuussutigalugit allannguutissatut siunnersuummi matumani nr. 5 aamma nr. 6 Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataaasa akuerisinnaanngilaat.

Aningaasanut inatsisissatut siunnersuutip aappassaaneerneqarnerani Aningaasaqarnermut Ataatsimiititaliap isumaliutissiissutaani immikkoortoq 2.10 aamma 3.8-mi Naalakkersuisut sanaartornermut pilersaarutaat pilugit amerlanerussuteqartut oqaaserisaat innersuussutigalugit allannguutissatut siunnersuut Aningaasaqarnermut Ataatsimiititaliami amerlanerussuteqartut, Inuit Ataqaigiit Demokraatillu ilaasortaataaasa akueraat.
(Allannguutissatut siunnersuut nr. 281)

Konto pingaarnermut 89.72.12-imut Taartaasussanik sanaartorneq

Tuapannguani sanaartukkat ilaasa inissianik nalinginnaasumik attartortitsisarnermi atugassarititaasut naapertorlugit attartortinnissaannut piginnaatinneqarnissaq Naalakkersuisut siunnersuutigaat.

Allannguutissatut siunnersuut taanna Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataa akuerisinnaanngilaat. Taamaalillutillu nalinginnaasumik inissianik attartortunit Tuapannguani sanaartukkani attartortut annertunerusunik piunasaqarfigineqarnerat naammaginangitsoq tunngavissaqanngitsorlu ikinnerussuteqartut isumaqarput.

Piginneqatigiilluni inissiaatillit peqatigiiffiisa aningaasaqarnerannik qulakkeerinninnissamik pisariaqartitsineq pillugu Naalakkersuisut nassuiaataat innersuussutigalugit Allannguutissatut siunnersuut taanna Aningaasaqarnermut Ataatsimiititaliami amerlanerussuteqartut, Inuit Ataqtigiit Demokraatillu ilaasortaataa akueraat, tassa taakku imminnut ingerlattut nammineq aningaasaqarnerminnut akisussaasuullutik immikkortuummata.

Qaammatinut arfinilinnut qularnaveeqqummik akileeqqusinissamut aammalu inissiani ileqqorissaarnissamut maleruagassanik malinninnissamut kiisalu piffissaq eqqorlugu ineqarnermut akiliisarnissamut sukannernerusunik piunasaqaateqarnermut inatsisitigut tunngavigineqartut erseqqinnerusumik nassuiaatigineqarnissaanik Naalakkersuisut Aningaasaqarnermut Ataatsimiititaliamit qinnuigineqarput. Tamanna pingajussaaneerinissamut akissuteqaammi pissasoq ataatsimiititaliamit kissaatigineqarpoq.
(Allannguutissatut siunnersuut nr. 283)

4.2 Aningaasaqarnermut Ataatsimiititaliap oqaasertaliussanut allannguutissatut siunnersuutaa

Allannguutissatut siunnersuut ataaseq Aningaasaqarnermut Ataatsimiititaliamit saqqummiunneqarpoq. Allannguutissatut siunnersuut taanna 293-imik normoqarpoq.

Allannguutissatut siunnersuut nr. 293 **akuerineqassasoq** Aningaasaqarnermut Ataatsimiititaliamit **inassutigineqarpoq**.

Konto pingaarnermut 80.00.88-imut Nunaqarfinni isorliunerusunilu sanaartortitsinissanut pilersaarutit

Aappassaaneerinermi kontomut pingaarnermut matumunnga Naalakkersuisut allannguutissatut siunnersuummik nr. 117-imik saqqummiussipput. Tamatuma kingunerisaanik aappassaaneerinissamut isumaliutissiisummi Aningaasaqarnermut Ataatsimiititaliaq ima allappoq:

” Kontomut pingaarnermut oqaasertaliussami nr. 1-imi allannguisoqassasoq tamatumalu peqatigisaanik nutaamik oqaasertaliussinissaq (nr.3) Naalakkersuisut siunnersuutigaat. Oqaasertaliussassatut nutaatut siunnersuutigineqartoq (3) naapertorlugu illullortitsinermut pilersaarutit, nutarnerulersitsiniarluni suliniuteqarnermut ilaasut akornanni aningaasanik nuussinissamut Naalakkersuisut piginnaatinneqarput.

*Aningaasanut inatsisissatut siunnersuutip pingajussaaneerneqarnissaanut oqaasertaliussamut tassunga allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit **qinnuigineqarput**, taamaalilluni nuussinissat Aningaasaqarnermut Ataatsimiititaliamit akuerineqartussanngorlugit. Tamatumunnga malinninnissaq aappassaaneerinissamut akissuteqaamminni uppersaqqullugu Naalakkersuisut qinnuigineqarput.”*

Allannguutissatut siunnersuummik taama ittumik saqqummiussisoqassasoq Naalackersuisut aappassaaneerinissamut akissuteqaamminni oqaatigaat. Taamaaliortoqanngilarli. Naalackersuisut nalunaaruteqanngilluinnarlutik allannguutissatut siunnersuummik taamaattumik saqqummiussinnginnerat Aningaasaqarnermut Ataatsimiititaliamit naammaginangilluinnartutut isigineqarpoq.

Taamaattumik allannguutissatut siunnersuut una Aningaasaqarnermut Ataatsimiititaliamit saqqummiunneqarpoq:

Konto pingaarnermut 80.00.88-imut Nunaqarfinni isorliunerusunilu sanaartortitsinissanut pilersaarutit

Nr. 1 aamma nr. 3-mut

Oqaasertaliussani marluusuni oqaatsit ”Inatsisartut Aningaasaqarnermut Ataatsimiititaliaannut ilisimatitsilluni” ima allanngortinneqassapput ”Inatsisartut Aningaasaqarnermut Ataatsimiititaliaata akuersineratigut”.

(Allannguutissatut siunnersuut nr. 293)

4.3 Allannguutissatut siunnersuutit aningaasatigut kingunissaat

Pingajussaaneerinissamut allannguutissatut siunnersuutit aningaasatigut kingunissaat takussutissiami matuma kinguliani allassimapput.

AIS10-mi IST-p inernerit	AIS 2010	M 2011	M 2012	M 2013
	(1000 kr.)	(Mio. kr.)	(Mio. kr.)	(Mio. kr.)
IST – Aningaasanut inatsisissatut siunnersuutaqaqartoq	225.600.000	122,5	138,1	27,2
IST – aappassaaneerinermit allannguutissatut siunnersuutitigut allannguutit	28.905.000	35,2	35,2	35,2
IST aappassaaneerinermit	254.505.000	157,7	173,3	62,4
DAU – pingajussaaneerinermit Naalackersuisut allannguutissatut siunnersuutaasigut allannguutit	-27.755.000	-7,9	-34,6	-36,2
IST NUTAAQ, Naalackersuisut siunnersuutaat	226.750.000	149,8	138,7	26,2
IST NUTAAQ, Aningaasaqarnermut Ataatsimiititaliap siunnersuutai	234.750.000	155,6	144,5	32,0

Naalackersuisut allannguutissatut siunnersuutaat tamakkiisumik malinneqarpata Nunatta Karsia 2010-mi **226,75 mio. kr.-inik amigartooruteqassaaq.**

Aningaasaqarnermut Ataatsimiititaliap allannguutissatut siunnersuutai tamakkiisumik malinneqarpata Nunatta Karsia 2010-mi **234,75 mio. kr.-inik amigartooruteqassaaq.**

Aningaasaqarnermut Ataatsimiititaliap allannguutissatut siunnersuutitut inassuteqaataasa Inatsisartunit suliarineqarnerat inaarutaasumik inernerisassamut apeqqutaassaaq.

5. Aningaasaqarnermut Ataatsimiititaliap kaammattuutai

Kaammattuut nr. 7

Angallannermut periusissaq aqputigalugu RAB A/S-imut angallatinik nutaanik pisinissap naliliiviginissaanut angallannermut isumalioqatigiissitaq periarfissinneqassasoq Aningaasaqarnermut Ataatsimiititaliap **kaammattuutigaa**. Angallatinik pisinermi piumasaqaatit angallatillu pisinnaassusiat kiisalu inuiaqatigiit aningaasaqarnerannut iluanaarutissat naliliinermi tassani ilanngunneqartariaqarput. Tamanna angallatinik pisinissap akuerineqarnera Naalakkersuisunit RAB A/S-imut *nalunaarutigineqartinnagu* soorunami pisariaqarpoq.

Kaammattuut nr. 8

Eqqagassalerinnermut pilersaarutip 2011-imi aningaasanut inatsisissatut siunnersuummi pingaarnersuilluni tulleriiaarinnermut ilanngunneqarnissaanut 2010-mi junip aallartinnerani suliniutigineqartut periarfissallu pillugit ilisimatitsissummik Naalakkersuisut **ulloq 10. juni 2009-mi** nassiussinissaat Aningaasaqarnermut Ataatsimiititaliamit **kaammattuutigineqarpoq**. Naalakkersuisut ilisimatitsissutaat Aningaasaqarnermut Ataatsimiititaliamut taamatullu Eqqissimatitsinnermut Avatangiisinullu Ataatsimiititaliamut nassiunneqassasoq qinnutigineqarpoq.

Kaammattuut nr. 9

Inatsisartut inatsisaannik suliarinnineq Naalakkersuisunit nukinginneqarqullugu Aningaasaqarnermut Ataatsimiititaliamit **kaammattuutigineqarpoq**, tassani aalajangersakkat Illuutip pilersinneqarneranut atuunneranullu maleruagassiisut ilanngunneqassallutik. Oqaasertaliussat sanaartornermut suliaasaqarfimmi ingerlatanut ullumikkut maleruagassiisut sapinngisamik amerlanerpaat inatsimmut tassunga ilanngunneqartariaqarput. Naalakkersuisut kingusinnerpaamik UKA 10-mi inatsisissatut siunnersuummik Inatsisartunut saqqummiussinissaat ataatsimiititaliamit naatsorsuutigineqarpoq.

6. Aningaasaqarnermut Ataatsimiititaliamit inassuteqaatit

Taama oqaaseqarluni Aningaasaqarnermut Ataatsimiititaliap aningaasanut inatsisissatut siunnersuut Inatsisartunit pingajussaaniigassanngortippaa.

Sammissaq 5-ip ataani allannguutissatut siunnersuutit nr. 211 aamma 213-imit 224-imut **akuerineqassasut** Aningaasaqarnermut Ataatsimiititaliap **inassutigaa**.

Sammissaq 11-ip ataani allannguutissatut siunnersuutit nr. 225, 227, 229-imit 233-imut **akuerineqassasut** Aningaasaqarnermut Ataatsimiititaliap **inassutigaa**.

Sammissaq 11-p ataani allannguutissatut siunnersuutit nr. 226 aamma 228 itigartinneqassasut Aningaasaqarnermut Ataatsimiititaliami ikinnerussuteqartut Siumup Atassutillu ilaasortaaitaasa **inassutigaat**.

Sammissaq 11-p ataani allannguutissatut siunnersuutit nr. 226 aamma 228 **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratitillu ilaasortaaitaasa **inassutigaat**.

Sammissaq 12-ip ataani allannguutissatut siunnersuutit nr. 234-imit 236-imut **akuerineqassasut** Aningaasaqarnermut Ataatsimiititaliap **inassutigaa**.

Sammissaq 13-ip ataani allannguutissatut siunnersuut nr. 237 **akuerineqassasoq** Aningaasaqarnermut Ataatsimiititaliap **inassutigaa**.

Sammissaq 13-ip ataani allannguutissatut siunnersuut nr. 238 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaaat**.

Sammissaq 13-ip ataani allannguutissatut siunnersuut nr. 238 **akuerineqassasoq** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaatitaasa **inassutigaaat**.

Sammissaq 14-ip ataani allannguutissatut siunnersuutit nr. 239-imit 242-mut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 15-ip ataani allannguutissatut siunnersuutit nr. 243-mit 257-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 16-ip ataani allannguutissatut siunnersuutit nr. 258 aamma 260-imit 261-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 16-ip ataani allannguutissatut siunnersuutit nr. 259 **itigartinneqassasoq** Aningaasaqarnermut Ataatsimiititaliamit **inassutigineqarpoq**.

Sammissaq 17-ip taani allannguutissatut siunnersuutit nr. 262-imit 269-imut itigartinneqassasut Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaaat**.

Sammissaq 17-ip taani allannguutissatut siunnersuutit nr. 262-imit 269-imut **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaatitaasa **inassutigaaat**.

Allannguutissatut siunnersuutit nr. 270-mit 272-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Sammissaq 18-ip ataani allannguutissatut siunnersuut nr. 273 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaaat**.

Sammissaq 18-ip ataani allannguutissatut siunnersuut nr. 273 **akuerineqassasoq** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaatitaasa **inassutigaaat**.

Sammissaq 22-ip ataani allannguutissatut siunnersuutit nr. 285-imit 287-imut akuerineqassasut Aningaasaqarnermut Ataatsimiititaliap **inassutigaaat**.

Sammissaq 22-ip ataani allannguutissatut siunnersuut nr. 284 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaaat**.

Sammissaq 22-ip ataani allannguutissatut siunnersuut nr. 284 akuerineqassasoq Aningaasaqarnermut Ataatsimiititaliami amerlanerussuteqartut Inuit Ataqtigiit Demokratillu ilaasortaataasa **inassutigaa**.

Sammissaq 23-ip ataani allannguutissatut siunnersuutit nr. 288-imit 289-imut aamma 291-imit 292-imut **akuerineqarnissaat** Aningaasaqarnermut Ataatsimiititaliap isumaqtigiittup **inassutigaa**.

Allannguutissatut siunnersuut nr. 290 **akuerineqassasoq** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu **inassutigaa**.

Allannguutissatut siunnersuut nr. 290 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu **inassutigaa**.

Allannguutissatut siunnersuutit nr. 274-imit 276-imut, 278-imit 280-imut, 282 aamma 294 **akuerineqassasut** Aningaasaqarnermut Ataatsimiititaliap **inassutigaa**.

Oqaasertaliussanut allannguutissatut siunnersuutit nr. 277, 281 aamma 283 itigartinneqassasut Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa **inassutigaa**.

Oqaasertaliussanut allannguutissatut siunnersuutit nr. 277, 281 aamma 283 **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataasa **inassutigaa**.

Allannguutissatut siunnersuut nr. 293 **akuerineqassasoq** Aningaasaqarnermut Ataatsimiititaliamit **inassutigearpoq**.

Allannguutissatut siunnersuutit pingajussaaneerinissamat saqqummiunneqartut Inatsisartunit taasissutigineqareerneranni inatsisissatut siunnersuut iluserilikkamisut iluseqarluni **akuersissutigineqassasoq** Aningaasaqarnermut Ataatsimiititaliami **amerlanerussuteqartut** Inuit Ataqtigiit Demokratillu ilaasortaataasa **inassutigaa**.

Inatsisissatut siunnersuut tamarmiusoq itigartinneqassasoq Aningaasaqarnermut Ataatsimiititaliami ikinnerussuteqartut Siumup Atassutillu ilaasortaataasa **inassutigaa**.

Niels Thomsen

Naaja Nathanielsen,
siulittaasoq

Per Berthelsen

Aqqaluaq Egede

Finn Karlsen